

華陽國志

卷一
三册

華陽國志卷第十上

先賢士女摠譜



含和誕氣人倫資生必有賢彥為人經紀宣德達教
博化篤俗故太上立德其次立功其次立言品物煥
炳彛倫攸叙也益梁爰在前代則夏敷配天而堯祖
體地及至周世韓服將命蕩子忠堅然顯者猶鮮豈
國史簡闕亦將分以秦楚希預華同自漢興以來迄
乎魏晉多士克生髦俊蓋世愷元之疇感于帝恩於
是璽書交馳於斜谷之南東帛交矣于梁益之鄉或
迺龍飛紫閣允陟璚瑛亦有磐桓利居經綸皓素其
耽懷道術服膺六藝 車之招旃旌之命徵名聘德

忠臣孝子烈士賢女高劬足以振玄風貞淑可以方蘋
繁者奕世載美是以四方述作來世志士莫不仰高
軌以咨訊憲洪猷而儀則擅名八區為世師表矣故
者舊之篇較義史漢而今志州部區別未可摠而言
之用敢撰約其善為述讚因自注解甄其洪伐尋事
釋義畧可以知其前言徃行矣

蜀郡士女

嚴平恬泊皓然沉冥 嚴遵字君平成都人也雅性
澹泊學業加妙專精大易耽於老莊常卜筮於市
假著龜以教與人子卜教以孝與人弟卜教以悌
與人臣卜教以忠於是風移俗易上下慈和日闡

得百錢則閉肆下簾授老莊著指歸為道書之宗
揚雄少師之稱其德杜陵李強為益州刺史謂雄
曰吾真得君平矣雄曰君但可見不能屈也強以
為不然至州脩禮交遵遵見之強服其清高而不
敢屈也歎曰揚子雲真知人也年九十卒雄稱之
曰不慕夷則由矣不作苟見不治苟得久幽而不
改其操雖隨和何以加諸

仲元抑抑邦家儀形

李弘字仲元成都人少讀五

經不為章句處陋巷淬勵金石之志成儀容止邦
家師之以德行爲郡功曹一月而去子贇以見辱
殺人太守曰賢者之子必不殺人放之贇自以枉

語家人弘遣亡命太守怒讓弘弘對曰贛為殺人
之賊嗣府私弘枉法君子不誘而誅也石碣殺厚
春秋譏之孔子稱父子相隱直在其中弘實遣贛
太守無以詰也州命從事常以公正諫爭為志楊
子雲稱之曰李仲元為人也不屈其志不累其身
不夷不惠可否之間見其貌者肅如也觀其行者
穆如也聞其言者愀如也非正不言非正不行非
正不聽吾先師之所畏

子雲玄達煥乎弘聖

楊雄字子雲成都人也少貧

好道家無擔石之儲十金之費晏如也好學不為
章句初慕司馬相如綺麗之文多作詞賦車騎將

軍王音成帝封舅也召為門下史薦待詔上甘泉
羽獵賦遷侍郎給事黃門雄既升秘閣以為詞賦
可尚則賈誼升堂相如入室武帝讀大人賦飄飄
然有凌霄之志不足以諷諫乃輟其業以經莫大
於易故則而作太玄傳莫大於論語故作法言史
莫善於蒼頡故作訓纂賦莫弘於離騷故及屈原
而廣之典莫正於爾雅故作方言初與劉歆王莽
董賢同官竝至三公雄歷三帝獨不易官年七十
一卒自劉向父子桓譚等深敬服之其玄源淵懿
後世大儒張衡崔子玉宋仲子王子雍皆為注解
吳郡陸公紀尤善於玄稱雄聖人雄子神童烏七

歲預雄玄文年九歲而卒

林生清森莫得而名 林閻字公孺臨邛人也善古
學古者天子有輜車之使自漢興以來劉向之徒
但聞其官不詳其職惟閻與嚴君平知之曰此使
考八方之風雅通九州之異同主海內之音韻使
人主居高堂知天下風俗也揚雄聞而師之因此
作方言閻隱遯世莫聞也

泛鄉忠貞社稷是經進賢為國稽攷典刑愛莫取之
身殞朝傾 何武字君公郿人也初以對策甲科為
郎歷揚兖州刺史司隸校尉京兆尹清河楚沛太
守廷尉御史大夫成帝初具三公拜大司空封泛

鄉侯爲人忠厚公正推賢進士在楚致兩龔在沛
厚兩唐臨司隸致茂陵何茲居公位進辛慶忌皆
世名賢臨州郡雖無赫赫之名及去民思之才雖
不及丞相薛宣翟方進而正直過之哀帝即位臣
朱博趙玄爲公御用事免官諫大夫鮑子都亟言
訟之丞相王嘉亦以爲慨帝復徵武爲御史大夫
徙前將軍特大司馬新都侯王莽避帝外家丁傅
氏遜位亦以列侯見徵哀帝詔博舉太常莽從武
求舉武以莽奸人之雄不許哀帝崩王太皇太后
莽姑也即日引莽入收大司馬董賢印綬詔舉大
司馬丞相孔光等逼王氏皆舉莽武與左將軍公

孫祿謀曰莽五父世朝權傾人主必危劉氏乃舉
祿祿亦舉武太后不從用莽為大司馬莽諷有司
劾奏皆免武就國後莽寢盛遂為宰衡安漢公欲
圖篡漢憚武與其叔紅陽侯王立不從元始三年
因呂寬吳章事檻車徵武武自殺衆咸寃之莽欲
厭衆心謚武曰刺侯子况嗣平帝崩莽因居攝後
僭王位

林文播教變風為雅道洽化遷我寔西魯 張寬字
林文成都人也蜀承秦後質文刻野太守文翁遣
寬詣博士東受七經還以教授於是蜀學比於齊
魯巴漢亦化之景帝嘉之命天下郡國皆立文學

由翁唱其教蜀為之始也寬從武帝郊甘泉泰畤
過橋見一女子裸浴川中乳長七尺曰知我者帝
後七車適見寬車對曰天有星主祠祀不齊潔則
作女令見帝感寤以為揚州刺史復別蚩莽之妖
世稱云七車張作春秋章句十五萬言

長卿彬彬文為世矩 司馬相如字長卿成都人也

遊京師善屬文著子虛賦而不自名武帝見善之
曰吾獨不與此人同世楊得意對曰臣邑子司馬
相如所作也召見相如相如又作上林賦帝悅以
為郎又上大人賦以風諫制封禪書為漢詞宗官
至中郎將世之作詞賦者自揚雄之徒咸則之

王泐豔麗尉君華國 王褒字子泐資中人也以高
才文藻侍宣帝初為王襄作樂賦中和頌宣帝時
又上甘泉洞簫賦帝善之令宮人誦之為諫大夫卒
子山翰藻遺篇有厚 楊終字子山成都人也年十
三已能作雷賦通屈原七諫章後坐太守徙邊作
孤憤詩明帝時與班固賈逵竝為校書郎刑太史
公書為十餘萬言作生民詩又上符瑞詩十五章
制封禪書著外傳十二卷章句十五萬言皆傳於
世者

少遷猛毅垂勲三邦 陳立字少遷臨邛人也成帝
時祥柯有亂將軍王鳳薦立為太守克平禍亂徙

守巴郡秩中二千石治有尤異又徙天水太守為
天下最天子賜黃金四十餉入為左衛護軍

世公賦政祥瑞來同 王阜字世公成都人也太守

第五倫察舉孝廉為重泉令有鸞鳥集於文學十
餘日遷益州太守神馬出滇池河甘露降白鳥見
民懷之如父母

犒款文父睿發幼童德澹會稽道崇辟雍 張霸字

伯饒謚曰文父成都人也年數歲以知禮義諸生

孫林劉固段著等宗之移家其字下啓母求就師

學母憐其稚對曰饒能故字伯饒也為會稽太守

撥亂興治立文學學徒以千數風教大行道路但

聞誦聲百姓歌詠之致達名士顧奉公孫松舉海
胡毋官萬虞先王演李根皆至大位在郡十年以
有道徵拜議郎遷侍中遂授霸五更尊禮於文學
年老卒葬於河南

少府委遲作卿作師 趙典字仲經成都人也太尉
戒孫也與潁川李膺等並號八俊三為侍中自樂
祿俸施貧方授國師未拜病卒

何楊研神貫奧入微 何英字叔俊郢人也 楊由
字衰侯成都人也二子學通經緯英著漢德春秋
十五卷孫汶字景由亦深學初徵上日食盜賊起
有劾為謁者京師旱請雨即澍遷捷為屬國著世

務論三十篇卒楊由為太守廉范文學范稱能治
由言當有賊發頃之廣柔羗反寇殺長姚超鄉人
冷豐齋酒候之值客未內由為知其多少又言人
當致果其色赤黃果有送甘橘者大將軍嘗憲從
太守索雲氣圖由諫莫與尋憲受誅其明如此著
書十篇而卒

司農明允國憲是維 任昉字文始成都人也初為

葉令治奸賊七十餘人遷梁相尚書令清身檢下
大將軍梁冀憚之出為魏郡徙平原歲出租稅百
萬冀誅復入為尚書令司隸校尉遷大司農卒弟
愷徐州刺史亦有治名昉父循字伯度為長沙太

守得其父時為五官事在精通也

翁君美秀牧後寤機 何霸字翁君司空武兄也為

郡戶曹刺史王尊將之官移諸郡不得遣迎太守

唯霸白空往太守遣霸尊大怒霸對曰太守遣霸

非脩敬也以去京師久遲知朝廷起居耳尊遽下

車持節對之因奇霸容止辟為別駕舉秀才為屬

國中郎將弟闕名潁川太守兄弟五人皆有名

伯騫推賢求善如飢 柳宗字伯騫成都人也初結

九友共學號九子及為州郡右職務在進賢拔致

求次方張种遼王仲曾殷智孫等終至牧守州里

為諺曰得黃金一笥不如為伯騫所議舉茂才為

陽夏太守

文侯顥印極位台衡

文侯趙戒字志伯少府典祖

也父定以遊俠稱戒順桓帝之世歷司徒太尉登
特進屢居公輔免憂患無妄之世告歸于蜀費

太尉頡頑志振綱

趙謙字彥信戒孫也歷位卿

尹初平元年為太尉時董卓秉政欲遷天子長安
謙與司空荀爽固諫卓不聽以為車騎將軍奉大
駕西幸封洛亭侯拜司隸校尉忤卓指免討白波
賊有功封侯進司徒免拜尚書令大僕三年薨諡
曰忠侯

司徒繼踵儷僥權橫

趙溫字子柔謙弟以侍中與

同輦西遷封江南亭侯先亡初平四年拜司空未
期進司徒當世禁之時車騎將軍李傕與董承張
濟等爭權數遷移天子温以書切責於傕天子聞
寒心尋曹公入徙天子都許政出諸侯禮待温居
公位十五年建安十三年薨

猶操道柄董李是讓 讓責也董卓李傕凶檀譙温
干之初文侯與李固胡廣議立清河王蒜而冀欲
立彝吾趙戒脅而從之使李固枉死君子以為卓
傕之惡甚於梁冀謙摩卓之年温弄傕之爪雖逼
權勢以道陳訓賢其祖遠矣

侍中授命分節亦章 常洽字茂居江原人也自荆

州刺史遷京兆尹侍中長水校尉以兵衛大駕西幸
催等作難常侍衛天子左右為催所煞

蠻夷猾擾倡亂南疆子恭要傳醜穢于壤 楊竦字

子恭成都人也永初中越雋永昌夷反殘破郡縣
衆十萬餘刺史張喬以竦勇猛授從事任平南中
竦先以詔書告喻不服乃加誅殺虜三萬餘人獲
生口千五百人財物四千萬降夷三十六種舉正
奸濁長吏九十人黃綬六十人南中清平會被傷
卒喬舉州乎贈列畫東觀

伯春孟元序正時君 張充字伯春 李兗字孟元

江源人也充為治中從事時刺史恃豪每見從事

布席地坐已自安高林上充入閣不肯進刺史寤
乃更禮從事刺史辟公孫特大姓犍為李威橋稚
充曹闕事節時有水災倫受刺史指以漢中升平不
足表聞絕固爭之後刺史至與倫不平求郡短劾
倫不言水災絕對以詔書上災異不得由州倫遷

司空辟絕緣

絕居希切說文微也始出

絕古字今作幾

楊羅為小遺愛在民 楊班字仲桓成都人也 羅

衡字仲伯郫縣人也俱師徵士何初山班為不韋
茂陵令治化浹洽徙西城閭中令號時名宰衡為
萬年令路不拾遺人家牛馬皆繫道邊曰屬羅公
三府爭辟拜廣漢長二縣皆為立祠

小伯温恭預圖息紛 陳湛字小伯成都人也歷數
縣令民皆懷之州辟治中從事廣漢太守遣子詣
州脩歡交使君欲納湛諫不可失羔羊義使君從
之後有言州郡私交者考之無得乃明也

孟由至孝避葉晞風 禽堅字孟由成都人也父信

為縣史越雋為夷所得傳賣歷十一種去時堅方
姪六月生母更嫁堅壯乃知父湮沒鬻力傭賃求

碧珠以求父一至漢中三出徼外周旋萬里經六

年四月突瘴毒狼虎乃至夷中得父父相見悲感

夷徼哀之即將父歸迎母致養州郡嘉其孝召功

曹辟從事列上東觀太守王商追贈孝廉令李苾

為立碑銘迄今祠之

仲昱勉師 仲昱成都人也少受學於嚴季后季后為汶江尉呼仲昱仲昱許十月往會反斷道仲昱期於往經渡六千餘里數年卒得至汶江為季后陳策俱得免難遠近歎之

郝本慕仁 任末字郝本繁人也與董奉德俱學京師奉德病歿推鹿車送其喪師亡身病齋棺赴之道歿遺令較子載喪至師門叙平生之志也

伯禽證將 朱普字伯禽廣都人也為郡功曹太守與刺史王冀有隙枉見劾普詣新都獄掠笞連月肌肉腐臭惡同歿人證太守無事較其子曰我歿

載喪詣闕使天子知我心事得情理普以烈聞

文寺代君

李磬字文寺嚴道人也為長章表主簿

旄牛夷叛入攻縣表倉卒走鋒刃交至磬傾身捍表謂虜曰乞殺我活我君虜乃殺之表得免太守嘉之圖象府庭

在三義彰終始可稱人生於三事若一君父師也言人靡不有初鮮克有終普磬可謂能終始也

炎光中微臣述僭亂 炎火光也漢以火德王自高

祖至平帝十二世國嗣三絕平帝早崩安漢公王

莽字巨君遂篡天子位稱新室皇帝而茂陵公孫

述字子陽為莽導江卒正遂僭號于蜀

章王刎首 章明字公孺新繁人也 王皓字子離

江原人也明爲太中大夫葬篡位歎曰不以一身
事二主遂自殺皓爲美陽令去葬歸蜀公孫偕號
使使聘之皓乃自刎以頭付使者述慙怒誅其妻子
侯剛哭漢 剛字直孟新繁人也爲郎見葬篡位佯
狂負木斗守闕號哭葬使人問之對曰漢祚無窮
吾寧死之不忍事非主也葬追殺之

公卿絕脰亦蹈節貫 王嘉字公卿江原人也爲郎

去葬還留蜀公孫述先閉其妻子使人徯之嘉聞
王皓歎曰吾後之執亦自殺述慙貫其妻子

羅生美至思濟艱難述方遂非殘彼身幹 羅衍字

伯紀成都人也為述郎說述尚書解文御鄭文伯使諫述降漢為子孫福解鄭從之述怒閉二子於薄室六年二子守志不回遂出死卒衍察孝廉徵博士

劉主割據資我英俊鴻臚洞通與道推運何宗字彥英郫縣人也通經緯天官推步圖讖知劉備應漢九世之運讚立先主為鴻臚方授公輔會卒

君肅矯矯穎類倬群

何祇字君肅宗族人也初隸

為楊洪為太守李嚴功曹去郡數年以為蜀郡嚴

在官祇為洪門下書佐去郡數年以為廣漢洪猶

在官是以西土咸服諸葛亮之能攬拔秀異也祇

徙犍為太守卒

輔漢郎捷服時之勲 張裔字君嗣成都人也汝南許文休稱其才鍾元常輩也為輔漢將軍丞相長史丞相北征居府統事足食足兵

太常清密邃遠鉤深 杜瓊字伯瑜成都人也師事任安粗通經緯術藝為太常沉默慎密稱諸生之淳休休衆彥殊途同臻金聲玉振蜀之球琳 休休美也衆彥言此四十三人也易曰殊塗同歸百行齊致貴於流光顯稱揚名垂世此四十三人者雖五行不同俱以垂美如金玉之音器為世名寶

述蜀郡人士

敬司穆穆暢始立終 敬司馬氏女五更張伯饒妻也霸前妻有三男一女敬司產一男撫教五子恩愛若一霸卒葬河南敬司與諸子還蜀疾病遺令告諸子曰舜葬蒼梧二妃不從汝父在梁吾自在蜀亦各其志勿違教也遂葬蜀子光超樂母教為聘士也

叔紀婉婉十媛仰風 林紀霸女孫也適廣漢王尊

至有賢訓事姑以禮生子商海內名士廣漢周幹古朴豉耄漢中祝龜為作頌曰少則為家之孝女長則為家之賢婦老則為子之慈親終 温且惠

秉心塞淵空謚曰化明惠母

公乘氏張兩髦義崇 公乘會妻廣都張氏女也夫
早亡無子姑及兄弟欲改嫁之張誓不許而言之
不止乃斷髮割耳養會族子事姑終身

助陳撫孩節篤分元 助陳臨邛陳氏女媿為楊鳳
珪妻也鳳珪亡養遺生子守節兄弟必欲改嫁乃
引刀割咽宗族駭之笑以遂全其義

二常燒燒頽構再隆 元常靡常江原人也元常廣
都令常良女適廣漢便敬賓早亡元常無子養賓
族子父母欲嫁乃祝刀誓志而死靡常仲山女適
成都殷仲孫家遭疫氣死亡惟靡常在十八收葬
諸喪養遺生子立美成家

紀常哀哀精感昭融 紀常常侍常洽女趙侯夫人
也父遇害在長安一兄皆先歿遣父門生瞿登張
順迎喪時寇賊蜂起晝夜悲哀順登得柩喪無恙
還時人皆以紀常精誠所感

貢羅誓志 貢羅耶羅倩女景奇妻也奇早亡無子
父慙其年壯以許同郡何詩貢羅白晝誓父不還
家父使詩乃白州州告縣逼遣之羅乃訴州刺史
高而許之

玄何忘生 玄何耶何氏女成都趙憲妻也憲早亡
無子父母欲改嫁何恚憤自幽乃不食旬日而死
郡縣為立石表

昭儀殉身 昭儀新繁張氏女廣漢朱琳賢妻也賢
為郡督郵建安十九年劉主圍劉璋於成都賢坐
謀外降璋以昭儀配兵將見逼昭儀自殺三軍莫
不哀歎

三姚見靈 廣柔長郡姚超二女姚妣饒未許嫁隨
父在官值九種夷反殺超獲二女欲使牧羊二女
誓不辱乃以衣連腰自沈水中死見夢告兄慰曰
姊妹之喪以某日至漑下慰寤哀愕如夢日得喪
郡縣圖象府廷

峨峨淋媛表圖銘旌 淋善媛婉婉也言此十二女
皆圖像列傳

述蜀郡列女

右蜀郡士女讚第一 凡五十五人

四十三人
士
十二人
女



卷之六

...

...

...

...

...

...

...

...

...

...

...

華陽國志卷十中

廣漢士女

講學沖遠洙泗是稀胤帝紹聖庶熙疇咨

漢書 宣字

君緯什邡人也少受學於楚國王子張天文圖緯於河內鄭子侯師事楊翁林能暢鳥言長於災異教授弟子以百數成帝徵拜諫大夫帝無嗣宣上封事勸宣以定陶恭王子為太子帝從之出宣為交州牧太子即位為哀帝拜河內太守徵太倉令上宣封周公孔子後帝從之封周公孫相如為褒魯侯孔子後孔均為褒成侯又薦遼東王綱瑯琊徐吉太原郭越楚國龔勝等宣贊隆時雍平帝時命持節為講學大夫與劉歆共校書居攝中卒門

生河南李吉廣漢嚴象趙翹等皆作大儒

長伯撫遐聲暢中箴祈虎命邦綽有餘徽 鄭純字

長伯鄭人也爲益州西部都尉處地金銀琥珀犀
象翠羽出作此官者皆富及十世純獨清廉毫毛
不犯夷漢歌歎表聞三司及京師貴重多薦美之
嗣帝嘉之乃改西部爲永昌郡以純爲太守在官
十年卒列画頌東觀

三老泱泱實作父師 楊統字仲通新都人也事華

里先生炎高高戒統曰漢九世王出圖書與御適
應之建武初天下求通內識二卷者不得永平中
刺史張志舉統方正司徒魯恭辟掾與恭共定音

律上家法章句及二卷解說遷侍中光祿大夫以
年老道深養於辟雍授几杖爲三老卒內識二卷
竟未詳

平仲涉道始乎庶幾 王祐字平仲鄭人也少與雒
高士張浮齊名不應州郡之命司隸校尉陳紀山
名知人稱祐天下之高年四十二卒弟獲志其遺
言撰王子五篇東觀郎李勝文章士也作誄方之
顏子列畫學官獲存作灌

文父明洞探賸索微 楊序字仲桓統仲子也道業
侔父三司及公車連徵辭拜侍中上言四方及荆
交州當兵起人民疫蝗洛陽大水宮殿當災三府

當免近戚謀變皆効驗大將軍梁冀秉權自退去
授門徒三千人本初元年及建和中特徵聘不行
年八十三卒天子痛惜詔謚曰文父弟子雖昭約
節寧綿竹寇權文儀蜀郡何萇幼正侯祈升伯巴
郡周舒郝布及任安董扶等皆徵聘辟舉馳名當
世

元章玄伯齟光匿耀 段翳字元章新都人也明經

術妙占未來常告大渡津口曰某日當有諸生二
人荷擔問翳舍處者幸為告之後竟如其言又有
人從冀州來學積年自以精究醫術辭去翳為箇
作書封頭與之告曰有急發之至葭萌爭津吏搥

從者頭諸生發筒筒中有書曰到葭萌爭津破頭
以膏裹之生乃喟然知不及醫還更精學醫常隱
匿不使人知門人皆號夫子

稚子奕奕古之畏愛

王浚字稚子郾人也初為河

內溫令路不拾遺臥不閉門民歌之曰王稚子世
未有平徭役百姓喜遷兖州刺史部中肅清徵拜
侍御史洛陽令聰明惠術公平廉正抑強扶弱化
行不犯發奸植伏思若有神京華密靜權豪畏敬
元興元年卒百姓痛哭二縣平祭行人商旅莫不
祭之賈胡左威遭其清理制服三年洛陽弦歌之
為立祠天子悼惜每下詔書德令必賜後嗣與卓

茂等為伍

敬伯愷悌樹德播惠 王堂字敬伯鄆人也初臨邑
郡進賢達士舉孝子嚴永隱士黃錯及張瑞陳髦
民為立祠徙任左扶風政教嚴明帝舅車騎將軍
閻顯大將軍竇憲中常侍江京等囑託輒拒之白
庶見象不以為祥徙魯相又徙汝南守舉陳蕃為
功曹應嗣司隸校尉號知人之鑑

杜寧濟濟以禮進退 馮顥字杜寧鄆人也少師事
楊仲桓及蜀郡張光超後又事東平虞林雅初為
謁者威儀濟濟為成都令遷越雋太守所在著稱
為梁冀所不善冀風州追之隱居作易章句及刺

奢說修黃老恬然終日

大匠奇暢妙監玄察盡言世規祇以隕越 翟醜字

子超雒人也少師事段熲以明天官為侍中尚書

常見太史令孫懿歔歔涕泣曰圖書有賊臣孫登

將以才智為黃門開路君表相應之是以壞墻後

為京兆尹光祿大夫將作大匠上言漢四百年當

有弱主閉門聽政數在三百年之間薦故太尉龐

參故司徒李郃明通三才忠正可以輔世所言每

指利疾權貴誣醜及尚書令高堂芝交構免外著

援神契經說卒家

司隸聰敏奮名後葉 郭賀字高卿雒人也初為太

守黃幸戶曹幸有事與漢中太守李榮俱被徵賀
勸幸星行詣詔獄自歸得免榮稽留詔殺之由是
顯名太守蔡茂命為主簿茂夢坐太極殿上得嘉
禾三穗以問賀對曰明府位當至三公旬月茂遷
司徒表賀明律令稍遷侍中尚書僕射司隸校尉
荊州刺史明帝南巡狩喜其治徵河南尹卒天子
痛惜賜錢三十萬

鐔恭翩翩交友惟賢 鐔頭字子誦鄴人也 蔡亨

字子騫雒人也俱攜手共學冬則侍親春行受業
與張霸李郃張皓陳禪為友共師司徒魯恭頭又
與王稚子同見察孝於太守陳司空歷豫州刺史

光祿大夫侍中衛尉弓爲廬江太守徵拜郎而霸
郃皓禪皆至公卿

兩李麗采文藻可觀 李尤字伯仁李勝字茂通雒
人也侍中賈逵薦尤有相如揚雄之才明帝召作
東觀碑雍德陽諸觀賦銘懷戎頌百二十銘著政
事論七篇帝善之拜諫大夫樂安相後與劉珍共
撰漢記孫充有文才勝爲東觀郎著賦諫論頌數
十篇

憲父懸車 王稚字赫起堂幼子也屢拒孝廉公府
十五辟公車徵及授二千石徵以太常終不詣年
八十一卒門人錄其本幸諡曰憲父癸未詔書以

安車聘請會已亡

徵君肥遯 馮信字季誠鄴人也郡三察孝廉州舉
茂才公府十辟公車再徵不詣公孫述時託目青
昏傳婢奸其前陽不覺述卒以年不之出

董任循志東帛戮戮 董扶字茂安任安字定祖綿
竹人也家居教授弟子自遠而至扶初應賢良方
正詣京師宰府十辟公車三徵再舉有道為侍中
觀漢將亂求為屬國還蜀安察孝廉及茂才公府
辟公車徵皆不詣卒布衣弟子杜微何宗杜瓊皆
名士至御筵

文表汎博提攜士彥

王商字文表廣漢人也博學

多聞州牧劉璋辟為治中試守蜀郡太守荊州牧
劉表大儒南陽宋仲子遠慕其名皆與交好許文
休稱商中夏王景興輩也商勸璋攬奇技雋甚善
斥採薦致名士安漢趙韙及陳寶盛先墊江鶴揚
趙敏黎景閔中王澹江州孟彪皆至州右職郡守
又為嚴李立祠正諸祀典在官一十年而卒

超類拔萃寔惟世信

劉寵字世信綿竹人也出自

孤微以剛公羊春秋上計闕下見除成都令政教
剛肅時諸縣多難治乃換寵為郡令又換鄆安漢
皆垂績還在成都遷牂柯太守初乘一馬之官布
衣蔬食儉以為教居郡九年乘之而還吏人為之

立銘王商陳實當世貴士皆與為友

節英元烈仰訢野臣 段恭字節英維人也少周流

七十餘郡求師受學經三十年凡事馮翊駱異孫
泰山產之章渤海紀對陽遂明天文二卷東平虞
种雅學絕高當世遂遊於蜀恭以朋友禮待之後
為上計掾為有司初太尉龐參兼舉茂才孝廉參
性忠正亮直為貴戚所擠以恚發病遠近稱寃恭
不能耐其狂元䟽表參忠直不當以讒佞傷毀忠
正帝悟即日召西曹掾問疾尋 羊酒慰勞參忠
士游孝淳感物悟神 姜詩字士游維人也事母至
孝母欲江水及鯉魚膾又不能獨食須隣母共之

詩嘗供備子汲江瀈奴秘言遺學不使母知於是
有涌泉出於舍側有江水之香朝朝出鯉魚二頭
供二母之膳其泉灌田六頃施及比隣公孫述平
後東精為賊掠害不敢入詩里時大荒餓精致米
肉與詩詩埋之永平二年察孝廉明帝詔曰大學
入朝孝廉一切皆平之除江陽符長所居鄉皆為
之立祠

少林陰德陽報是甄 王忱字少林新都人也遊學
京師見客舍有一書生因病忱隱視奄忽便絕有
金十斤忱以一斤買棺木九斤還腰下葬埋之後
為大度亭長大馬一匹來入亭中又有繡被一領

飛墮其前人莫識者郡縣昇忱後乘馬到雒縣馬牽忱入他舍主人問忱所由得馬忱具說其狀并及繡被主人悵然曰御何陰德而致此忱說昔埋書生事主人驚曰是我子也姓金名彥卿乃葬之不報天彰御德辟舉茂才除郿令宿弊亭中數有人為鬼所殺忱上樓夜半有女子稱寃曰妾涪令妻也當之官宿此枉為亭長所殺大小二十口埋在樓下奪取財物忱曰汝何故恒殺人女子曰妾不得白日惟依夜翹人眠不肯應憲故殺之初來時言無衣忱以衣衣之言訖投衣而去且召遊徼詰問其服即收同謀十餘人殺之送涪令喪還郡

里當世稱之

仲魚謙沖 芊菴字仲魚鄆人也父為交州刺史卒

官菴迎喪不散取官舍一物郡三察孝廉公府辟
州別駕皆不應太守尹奉棄刑名行禮樂請為功
曹刺史必欲借菴自佐不得已為別駕後為太守
孫寶蔡茂殺諷功曹常欲渡津津吏滯停車待之
三日將宿亭中有縣吏引車避之為野王令

雲御安貧 朱倉字雲御什邡人也受學於蜀郡張

寧飡豆飲水以諷誦同業憐其貧資給米肉終不
受著河洛解家貧以步行為郡功曹每察孝廉羞
碌碌詣公府試不就州辟治中從事以諷詠自終

伯式玄照 折像字伯式雒人也其先張江為武威
太守封南陽折侯因氏焉父國為鬱林太守家資
二億故奴姪八百人盡散以施宗族卹贍親舊葬
以帛喪事東平虞林雅以道教授門人朋友自遠
而至時人為諺曰折氏客誰朱雲御段節英中有
佃子趙仲平但說天文論五經

孟宗當仁味道好施清風邁倫 讚仲魚已下也杜
真字孟宗綿竹人誦書百万言先事翟圃圃免後
尚書令與司隸校尉枉劾之復徵詣獄真上章救
之受掠笞六百獄中明圃無事京師壯之以漢道
微散財施宗族不應公州辟命及辭長吏候迎每

交於門乃斷髮以自絕

漢儒請雨精感慶雲 諒輔字漢儒新都人爲郡五

官掾時天大旱請雨不降輔出禱祈乃積薪祝神

曰不雨則欲自焚爲貧叨吏謝罪百姓言終暴雨

韓揆義烈 韓揆字伯彥綿竹人也爲令錡哀主簿

值黃巾賊入界扶哀走入草中哀遣求隱醫處未

還哀爲賊所得見害揆殯殮葬埋訖詣從事賈龍

求兵討賊賊破曰本報令君而苟自活非忠乃梟

喬雲勇震 左喬雲綿竹人也少爲左通所養爲子

通坐任徒徒逃吏欲破通贖通無壯子故爲吏所

侵喬雲時年十三喟然憤怒以銳刀煞吏解通將

走令出追初聞以為壯士及知小兒為之流涕
楊寬證將烈播友人 寬字仲舒新都人父斌證令
萬世太守殺諷以忠義壯聞寬為郡吏鄉人馬閏
章言太守五方寬與兄偕詣獄證之得理後方當
遷南郡閏復章之寬乃發閏臨私事閏伏罪友人
汝錕為張暉所煞寬怒縛暉送錕家使自謝之也
甯林執仇 甯林自茂秦廣漢人與友人張昌共受
業太學昌為河南大豪呂條所殺林煞條自拘河
南獄順帝義而救之

張復師讎 張鉗字子安廣漢人也師事捷為謝裒
裒以負土成墳三年裒子為人所煞鉗復其仇自

拘武陽獄會赦免當世義之

賈為士外分伴虞朱

賈翊字元集什邡人也雒孟

伯元為父復讎聞相召往投之雒縣追伯元蹤翊
歎曰士以義遇我豈可信哉然雒縣必移什邡負
我君乃自煞李勝言之以方虞卿魯之朱家

爰迄劉氏司農含章爽朗翠桀觀國之光

秦宓字

子毅綿竹人也初隱遁不應州郡之命丞相亮領

益州牧以遜為別駕中郎將吳使張溫將反命亮

率百官餞之溫與宓語吞問若響應聲辭義雅美

溫大敬服以為蜀之有宓猶魯仲尼也遷長水校尉

司農宓甚有通理弟子譙周具傳其業

李王四子竝作琳琅 李朝字永南弟邵字 偉南

鄭人也王士字義強從弟甫字國山文表諸弟也

先主領牧朝為別駕群下上先主為漢中王其文

朝所造也後丞相亮府辟西曹掾亦有文才兄弟

三人號三龍士歷宕渠犍為益州太守甫善言議

關人流美稱自綿竹令為州右職

優游容與特進太常 鐔承字公文鄭人也歷郡守

州右職為少府太常時費姜秉政孟光來敏皆棲

遲承以和獨立特進之也

從事烈至諫君側首 王累新都人也州牧璋從別

駕張松計遣法正迎先主主簿王權諫不納累為

從事以諫不入乃自劾州門以明不可

鄭度進規忠謀莫受雖云天時抑由人咎度綿竹人也先主自葭萌南攻說牧璋曰左將軍懸軍襲我野穀是資急驅巴西梓潼民內涪水以南一切燒除野穀固壘待之彼請戰不許久無所資不過百日必當回先主聞而惡之璋不細言雖天亦由璋之愚

永年負才自喪世主

彭美字永年廣漢人有俊才

劉璋時坐事為徒及先主入自託龐統為州右職

失主左遷江陽太守美望諸葛亮以為心大志廣

難可保勸先主因事誅之

漢南哽哽天奪其守 李邈字漢南邵兄也牧璋時

為牛鞞長先主領牧為從事正旦命行酒得進見

讓先主曰振威以討賊元功未効先寇而滅邈以

將軍之取鄙州甚為不宐也先主曰知其不宐何

以不取之邈曰匪不散也力不足耳有司將殺之

諸葛亮為請得免為犍為太守丞相參軍安漢將

軍建興六年亮西征馬謖在前亮將殺之邈諫以

秦赦孟明用霸西戎楚誅子玉二世不競失亮意

還蜀十三年亮卒後主素服發哀三日邈上疏曰

呂祿霍禹未必懷反叛之心孝宣不好為殺臣之

君直以臣懼其偏主畏其威故斬萌生亮身杖強

兵狼顧虎臣五大不在邊臣常危之今亮殞歿蓋
宗族得全西戎靜息大小為慶後主怒下獄誅之
誅誅彥造或哲或友昭德音芳垂名厥後摠讚此四
十六人也

述廣漢人士

任母治內子成名賢 任安母姚氏也雍穆閨門早
寘立義資安遂事大儒安教授每為賑卹其弟子
以慰勉其志於是安之門生益盈門

龐行養姑婦師之先 龐行姜詩妻也事姑晝夜紡

績以給供養子汲江溺水外秘言遣詣學常作冬
夏衣投水中託言寄與子詩呼妻使為姑舂應命

遲見遣不敢遠去遊於外供給因隣母致姑敕還
依依義舊抗疏邦廷誠感世主徙女輒刑 義舊狄
道長姜穆女綿竹司馬雅妻也既許婚父坐事徙
朔方雅就婚歿僱人送其喪尋父母歿朔方義舊
獨與弟孤居十年士大夫求終不肯乃上疏自訟
求還鄉里天子愍悼下朔方使送遂下詔書定律
令女已許嫁不得從父母徙

紀配銜指以章厥身

紀配廣漢縣氏女廖伯妻也

年十六適伯伯早亡已自有美色慮人求已作詩
三章自誓心而求者猶衆父母將許乃銜指明情
養子猛終義太守薛鴻圖象府廷

彭王進娥殘體令誠

彭非廣漢王輔妻也王和新

都人便敬妻也李進娥鄭人馮季宰妻也輔早亡
其父欲改嫁非乃詣太守五方截髮自誓敬亦早
亡和養姑守義蜀郡何玉因媒介求之兄曉喻以
公族可憑和惠割一耳季宰亦早亡父母欲改嫁
進娥亦剪髮自誓各養子終義

正流自沉水絜水清

正流廣漢李元女楊文妻也

適文有一男一女而文歿以織履為業父欲改嫁
乃自沉水中宗族拯之得免太守五方為之圖象

相烏袁福義不存生

相烏德陽人袁稚妻也十五

適稚二十稚亡無子父母欲改嫁之便自殺袁福

亦德陽人王上妻也有二子上以喪親過哀歿福
哀感終身父母欲改嫁乃自殺

洪氏世胄由婦謙柔 汝敦妻某敦兄弟共居有父
母時財嫂心欲得妻勸送二兄躬盡讓田宅奴婢
與兄自出居後躬耕得金一器妻復勸送二兄夫
妻共住嫂性恠嗇謂欲借貸甚不悅及見金踊躍
兄感悟即出妻讓財還弟弟不受相讓積年後泣
察孝廉世為冠族

思媚烈媛美稱惟休揔讚十一人也

述廣漢烈女

右廣漢郡士女讚第三

凡五十六人

四十六人
十一人女

捷為士女

王延河平篡禹之功 王延世字長林資中人也建
始五年河決東郡汜濫兗豫四郡三十一縣沒官
民屋舍四萬所御史大夫尹忠以不憂職致河決
自煞漢史案圖緯當有能循禹之功在捷柯之資
陽求之正得延世徵拜河隄謁者治河以竹落長
四丈大九圍夾小船載小石治之三十六日隄防
成帝嘉之改年曰河平封延世關內侯拜光祿大
夫乃賜黃金百斤

文伯習禮繼武孫通 董鈞字文伯資中人也少受

業於鴻臚王臨永平初議天地宗廟郊祀儀禮鈞

與太常定其制又定諸侯王喪禮歷城門校尉五官中郎將以儒學貴稱繼祚孫通

張公執憲克智克聰極位青紫寔作司空 張皓字

祚明武陽人也以文聰剛辟大將軍掾遷尚書僕射鉅城相進隱士閭丘遷等徵拜廷尉延光三年安帝將廢太子為濟陰王皓與太常桓為太僕來歷爭之安帝不許及安帝崩濟陰得立為順帝以皓為司空久之免後徵為廷尉清河趙騰等坐誣訕當誅所引八十餘人皓以聖賢明義爭之咸稱平當

子鸞司京桴鼓不鳴 趙旂字子鸞資中人也初臨

甘陵弘農郡甚善治民徵尚書遷司隸校尉時梁冀子弟放恣旃以法繩之不敢為非京師肅清桴鼓不鳴

孟文翹翹平頭有成 楊渙字孟文武陽人也以清秀博雅歷臺郎相稍遷尚書中郎司隸校尉甚有嘉聲美稱

伯邳正直耀祖楊聲 楊準字伯邳漢安縣人也初為郡守太尉李固薦準累世忠直拜尚書太傅陳蕃表為河東人為尚書令奏書治南陽太守曹廉潁川太守曹騰濟南太守孫訓等子弟依託形勢淫縱徵廷尉治罪訓梁冀婦家子也於是憚之又

薦朱禹盛精膝延為尚書陸稠為郡守皆名士也
桓帝即位拜河南尹遷司隸校尉冀封父梁忠為
執金吾不朝正初劾奏之朝士服其公亮徒將作
大匠

翁君將命迺播其名 楊莽字翁君武陽人為功曹

刺史王尊當之州移書諸郡不得遣迎惟捷為遣
莽何霸巴郡遣嚴尊尊大怒莽前對曰使君不使
奉迎謙也太守承迎敬也謙敬上下之節不可廢
也尊乃欣請辟別駕舉茂才官至揚州刺史

奉君遜世 費貽字奉君南安人也公孫述時漆身
為厲佯狂避世述破為合浦守蜀中歌之曰節義

至仁費奉君不仕亂世不避惡君修身於蜀紀名
亦是後世為大族

任公開明 任永字君業楚道人也長歷數王莽時
託青盲公孫述時累徵不詣子溺井中久見而不
言妻淫於前面而不恠述平乃曰世適平目即清
妻自煞光武徵之以年老不詣卒

杜和順終 杜撫字杜和資中人也少師事薛漢治

五經教授門生千人太守王卿召為功曹司徒辟
不及聞公免必往承問東平憲王為驃騎將軍辟

西曹掾後罷為王師在驃騎府者數年乃去數應

三公 徵撫侍送故公作詩通議說弟子南陽馮

良亦以道學徵聘

君橋密精 趙松字君橋武陽人爲童子數咨問費
貽及知其避世密與周旋終不露之也述平舉茂
才爲上黨太守

英英四子利於居貞 讚費貽以下

皇漢弛綱官人失紀文紀蹇諤表闕臧否 張綱字

文紀司空皓子也在漢朝公平廉正權官側目憚

之漢安元年以光祿大夫持節與侍中杜喬循行

州郡考察風俗出宮垣埋車先奏太尉桓焉司徒

劉壽尸祿素飧不堪其職出城又奏司隸校尉趙

峻河南尹梁不疑汝南太守梁乾等贓穢濁亂檻

車送廷尉治罪天子以乾梁冀种父敗秩免峻等
又奏魯相寇儀儀自殺威風大行郡縣莫不肅懼
還冀恨之出為廣陵太守承叛亂後懷集撫恤甚
有治化在官十年卒子續為尚書續弟方為豫州
牧子孫數世至大官

白虜狂僭亂離斯圯孝仲繫馬社稷是外 朱遵字
孝仲武陽人也公孫僭號遵為犍為郡功曹領軍
拒戰於六水門衆少不敵乃埋車輪絆馬必死為
述所煞光武嘉之追贈復漢將軍郡縣為立祠

建侯弔梁劾志知已 趙躬字建侯武陽人也初為

新都令德禮宣流三司及大將軍梁冀累辟終不

詣冀辟書不絕後冀自煞使者監守不使人吊問
躬獨往弔祭訖自拘有司天子赦之

林通躬孝石生江汜 隗相字林通楚道人也養母

至孝母食欲江中正江水相冬夏汲之一朝有橫
石生正流中哀帝世察孝廉平帝世為郎

吳生致養亦感靈祉 吳順字林和楚道人也事母

至孝赤烏巢其門甘露降其戶察孝廉永昌太守

劉后初載實多良才季休忠亮經事能治 楊洪字

季休武陽人也先主領牧為部屬從事及征漢中

丞相亮表為蜀郡太守先主疾病永安召亮東行

漢嘉太守黃元反後主從其計克元封關內侯後

為中郎將越騎尉清公亮甚信任之

德山就學道以光時 伍梁字德山南安人也儒學

雅尚州選迎牧諸葛亮為功曹遷五官中郎將

烈武作合度曠塗夷惜我公舉帥直凌達 費詩字

公舉南安人也先主領牧為前部司馬群臣勸先

主稱尊號詩上疏曰殿下以曹操父子逼主篡盜

故乃羈旅萬里糾合士衆將以討賊今大敵未剋

而先自立恐人心疑惑昔高祖獲子嬰猶尚推讓

况未出門便欲自立耶以是左遷部永昌從事建

興三年從丞相亮南征魏將李鴻來降說魏新城

太守孟達欲背魏向蜀亮方北面欲招達為外援

欲與書詩進曰孟達小子昔事振威不忠後事先
帝背叛反覆之人何足與書也亮默然詩終劉氏
之世官位不盡其才君子以昭烈之弘曠武侯之
剛達詩吐直言猶尚凌達况庸主昏世帥意直言
而望肆劾者哉

文然簡略不從詭隨 楊義字文然武陽人也輔漢
將軍張裔薦為丞相亮主簿大司馬蔣琬辟東曹
掾歷二郡太守為射聲校尉性簡略未曾以甘言
加人酒後言笑多悞詞失大將軍姜維意為維所
廢延熙十八年作季漢輔臣讚在蜀書

車騎快快與國安危 張翼字伯恭文紀孫也以文

武才幹歷征西鎮南大將軍封亭侯延熙十八年
與大將軍姜維西征大破魏雍州刺史王經於狄
道經衆以洮水者數萬人維欲進翼諫不可必進
無功時維屢出隴西翼常違爭以為國小不宜黷
武必為虵畫足不聽不得已每怏怏從行景耀元
年遷左車騎將軍領冀州刺史蜀平後外

猗猗衆偉芳烈名垂方德繹勲捷之瓊瑰

述捷為人士

進楊穆穆先姑是憲 進武陽楊氏女大匠廣漢王
堂長子博也博後母文有母儀之德進楊則其教
為行閨門雅穆祥柯太守李穰家亦假係每不和

歎恨徒富貴學問不及博家也

陽姬請父厥族蒙援克諧內慶訓及秀產 姬武陽

人也生自寒微父 坐事閉獄楊渙始為尚書郎

告歸郡縣敬重之姬為處女乃邀道扣渙馬訟父

罪言辭慷慨涕泣渙懇告郡縣為出其父因奇其

才為子文方聘之結婚大族二弟得任官遂世為

官門後文方為漢中太守以趙宣為賢將察孝廉

函封未定病卒姬秘不發先遣孝廉上道乃發喪

宣得進用姬之力也後文方兄子伯邳為司緡校

尉時姬長子穎伯冀州刺史仲子頰二千石伯邳

以稟林母教迎在官舍每教邳政治伯邳欲舉茂

才選有二人伯邳欲用老者嫌以其耄欲舉五方
而其年幼以咨於母勸舉方後趙宣為媿為五方
為唐漢姬尚在故吏之敬四時承問不絕

周度割體貞節是全 周度楚道人也相登妻十九
登亡中年令吳厚因人求之斷髮以誓志後人猶
欲求之乃割其鼻養子早亡其妻左亦年十九遂
俱守義感歎婦姑之貞專其節操也

敬姬沉澗誠烈邈然 曹敬姬南安人也周紀之妻
十七出適十九紀亡遺生子元餘服闋父母以許
孫賓詒母病迎還知之自投水人赴之氣已絕一
日一夜乃蘇息送依紀弟居訓導元餘號為學士

年九十卒

貞玦玉操彌久彌刊 貞玦字瓊玉牛鞞程氏女張
惟妻也十九適惟未期惟亡無子養兄子悅供養
舅姑夙夜不怠資中玉冲欲娶玦玦辭父肱答以
女志不可奪冲為太守李巖督郵巖記縣遣孝義
掾奉羔雁宣太守命聘之玦乃自投水拯援不死
後太守蘇高為立表太守蜀郡闕 遣仁恕掾論
曰貞玦太守章陵劉威又為作頌故稱述也

韓姜自財后旌其寃 韓姜楚人尹仲讓妻也二十
讓亡服除資中董臺因從事王為表弟求姜不許
臺門生左習王蘇以為姜可奪教姜家言毋病迎

還韓氏因逼成婚姜聞故自殺太守巴郡龍楊衰
之殺習蘇以報姜死

謝姬引決同沉齊定 姬南安人武陽儀成妻也成
死以已年壯無子將葬乃預作殯殮具毒藥須夫
棺入墓拊棺吞藥而死遂同葬縣以表郡郡言州
州上尚書天子咨嗟下書每大赦賜家帛四匹蜀
教二石

媛姜匹婦勉夫濟子投命罔罔義踰國士 趙媛姜
資中盛道妻也建安五年道坐過夫婦閉獄子翔
方五歲姜謂道曰官有常刑君不得已矣妾在後
何益君門戶君可同翔亡命妾代君死可得繼君

宗廟道依違數日姜苦言勸之遂解脫給衣糧使
去代為應對度走遠乃告吏殺之後遇赦父子得
還道雖任宦當世痛感終不更取翔亦不仕耳

黃帛求喪沉身中流靈精相感攜夫共浮 黃帛楚
道人張貞妻也貞受易於韓子方去家三十里船
覆歿貞弟求喪經月不得帛乃自往沒處躬訪不
得遂自投水中大小驚睨積十四日持夫手浮出
時人為語曰符有先絡楚道帛求其夫天下無有
其偶縣長韓子冉嘉之召帛子幸之為縣股肱

烈哉諸媛節稱義遵叙之讚此九女也

述犍為烈女

右隸為士女讚第四

凡三十人

二十人
九人女





華陽國志卷十下 漢中士女

國中會

子訓

鄭真岳峙確乎其清 鄭子真襄中人也玄靜守道履至德之行乃其人也教曰忠孝愛敬天下之至行也神中五徵帝王之要道也成帝元舅大將軍王鳳備禮聘之不應家谷口號谷口子真亡漢中與立祠神中五徵未詳其義

衡梁涖盤玄湛潤亭

衛衡字伯梁南鄭人也少師

事隱士同郡樊季齊以高行聞郡九察孝廉公府州十辟公車三徵不應董扶任安徙洛還過見之曰京師天下之市朝也足下猶之人耳幸其在遠以虛名屢動徵書若至中國則價盡矣衡笑曰時

有儉易道有污隆若樊季齊楊仲桓雖應徵聘何
益於時乎苟無所則及軻栖栖是以君平子真不
屈其忠豈予之徒也哉吾何虛假之有安扶服之
敬其言也

鄧公方到忠枉原情

鄧公成固人也景帝時御史

大夫晁錯患諸侯強大建議減削會吳楚七國謀
反假言誅錯故吳相袁盎諧帝殺之拜盎太常使
赦七國七國遂叛鄧公為謁者入言軍事問曰七
國聞晁錯死罷兵不對曰吳王即山鑄錢煮海為
鹽謀反積數十年錯患之故欲削弱為萬世策諸
侯憂之計畫始行身以東市諸侯莫憚內杜忠臣

之口外為諸侯報怨臣竊為陛下不取也帝歎息
曰吾亦恨之武帝初為九卿

博望致遠西南來庭 張騫成固人也為人強大有

謀能涉遠為武帝開西域五十三國窮河源至絕
遠之國拜校尉從討匈奴有功遷衛尉博望侯於
是廣漢緣邊之地通西南之塞豐絕遠之偵令帝
無求不得無思不服至今方外開通騫之功也

子游師生讒巧所傾 張猛字子游騫孫也師事光

祿勳周堪以光祿大夫給事中侍元帝帝當廟祭
濟渭欲御樓船御史大夫薛廣德當車免冠乞頭
血污車輪陛下不得廟祭矣帝以不悅猛進曰主

聖則臣直今乘船危就橋安聖主不乘危故大夫
言之帝曰曉人不當如是也後與周堪俱以忠正
為幸臣弘恭石頭所譖變乍出乍徵堪平和猛卒
自救

王孫養性矯葬厲生 楊王孫成固人也治黃老家
累千金厚自奉養臨終告其子曰我死髀葬以復
吾真但為布囊盛歿入地七尺既下從足脫之以
身親土其子不忍見王孫友人祁侯諫之王孫曰
厚葬無益歿者也夫殫財送歿今日入明日葬此
真無異暴骸中原裹以帶帛隔以棺槨含以珠玉
後腐朽乃得歸土不可故吾欲早就真宅祁侯無

以易卒髀葬如其言

司徒監使術暢思精屢登上司七政是經 李郃字孟節南鄭人也少明經術為郡候吏和帝遣使者二人微行至蜀宿郃候舍郃為出酒夜飲露坐郃問曰君來時寧知二使何日發來耶二人在問之郃指星言曰有使星入益部後一人為漢中太守命為功曹察孝遂馳名為尚書徙左丞稍遷至尚書僕射尚書令拜司空又進司徒清公亮直當世稱名順帝世夢

矣精不類朱明不揚太尉蹇諤任國拔荒濯日暘谷將外扶桑惡直醜正漢道遂喪 李固字子堅郃

子也陽嘉三年以對策忠元拜議郎大將軍梁商

后父也表為從事中郎授荊州刺史值州部有亂

至州先友賢者南陽鄭躬宋孝節零陵支宣雅

表薦長沙桂陽太守趙歷卒已奏免江夏南郡太

守孔疇高賜為昆疑等州土自然安靜徙泰山

太守克寧盜賊入為將作大匠多致海內名士南

陽樊英江夏黃瓊廣漢楊厚會稽賀純光祿周舉

侍中杜喬陳留楊倫河南尹存東平王惲陳國何

臨清河房植等皆蒙徵聘轉大司農順帝崩太后

臨朝拜太尉與后弟大將軍梁冀太傅趙峻錄

尚書冲帝崩時徐楊有盜賊太后欲不發喪須召

諸王至固爭不可言國家多難宜立長君太后欲專權乃立樂安王為質帝質帝崩太后復與梁冀謀所立固與司徒南郡胡廣司空蜀郡趙戒書與冀引周勃霍光立文宣以安漢之策閻鄧廢立之祠言國統三絕期運厄會興崩之漸在斯一舉宜求賢王親近不可寢嘿也冀得書召公卿列侯議所立三公及鴻臚杜喬僉舉清河王蒜冀然之奏御太后中常侍曹騰私恨蒜說冀明日更議廣戒從冀固與喬必爭蒜宜立中興才也且年長識義必有厚將軍冀不聽策免固喬歲餘取下獄以無事出之京師市邑皆稱千萬歲冀惡其為人所善

更奏繫之固與書二公曰吾欲扶持漢室使之比

隆文宣何圖梁將軍迷謬諸子曲從以吉物為凶

成事為敗漢家衰微從是始矣將軍亦有不利吾

雖死上不慚於天下不愧於人求義得義死復何

恨遂自殺二公得書歎息流涕士民咸哀哭之桓

帝無道冀尋受誅漢家遂微政在閭宦無不思固也

元脩勳重威惠寔亮 張則字元脩南鄭人也為祥

柯太守威著南土永昌越雋夷謀欲反畏則換臨

其郡相諫而止號曰臥虎以戌狄勳遷護羌校尉

徵拜扶風又換臨桂陽皆平盜賊巴郡板楯反拜

隆集校尉鎮漢中徙梁州刺史又為魏郡太守所

在稱治靈帝崩後大將軍袁紹表為長史不就丞相曹公拜度遼將軍

子雅溫恭見察文方 趙宣字子雅南鄭人也出自寒微以溫良博雅太守犍為楊文方深器異之遂察孝廉官至犍為太守

二珪琬琰三辰懸望 趙瑤字元珪琰字稚圭凡七

兄弟宣子也皆以令德著聞瑤少有公望瑤始為緱氏表趙二公與書曰趙瑤在緱氏猛虎歸迹百里均耳封平何難遷扶風太守徙蜀郡相司空張溫謂之曰昔第五伯魚徙蜀郡為司空掃吾第以待足下矣瑤曰諾尋換廣漢卒琰始為青州刺史

部下清肅從梁相徵拜尚書不就卒

仲卿報友行義以理 陳綱字仲卿成固人也少與同郡張宗受學南陽以母喪歸宗爲安衆劉元所煞綱免喪徃復之值元醉臥還須醒乃煞之自拘有司會赦免三府竝辟舉茂才拜弘農太守初至有兄弟自相責引退是後無訟者在官九年卒天子痛惜賜家錢四十萬

伯度玄鏡榮辱已 李法字伯度南鄭人也桓帝時爲侍中光祿大夫數充表宦官秦盛樹房秦重史官記事無實錄之才虛相褒述必爲後笑帝怒免爲庶人恬然以咎失爲已責久之徵拜汝南太

守遷司隸校尉湛然無自得之容

德公在林懸象垂咎既冲雲清荀張儀准 李燮字

德公太尉固子也父歿時二兄亦歿為婦所遣

隨父門生王成亡命徐州備酒家酒家知非常人

以女妻之延熹二年梁冀誅後月經陽道暈五車

史官上書昔有大星升漢而西捲舌揚芒迫月熒

惑犯帝座則有大臣枉誅星在西方太尉固應之

今暈如之豈有赦命錄其遺嗣以除此異於是下

赦燮得返舊四府茲辟公車徵議郎與趙元珪潁

川賈偉節荀慈明張伯慎為友伯慎為潁川太守

與慈明交相言論偉節與焉京師以為臧否伯慎

問趙元珪曰德公所言何元珪曰無言也伯慎追
歎曰當如德公兒輩徒靡涕耳慈明亦寤而心變
拜東平相國王為黃中所沒得出天子復封之燮
以為不可果敗遷京兆尹時人為之語曰李德公
甫不欲立帝子不欲立王

伯臺處諫師言亢盡末命防萌妙觀玄揆 陳雅字

伯臺成固人也靈帝時為諫大夫閹官用事上疏
曰昔孝和帝與中常侍鄭眾謀誅大將軍竇憲由
是宦官秉權安帝幼冲和熹太后兄鄧騭輔政太
后適崩中常侍江京等殺騭安帝登遐黃門孫程
又殺車騎將軍閹頭孝桓帝又與中常侍單超等

共誅大將軍梁冀陛下即祚太傅陳蕃大將軍竇武尚書令尹勳等欲誅宦官絕其奸擅盡忠王室建万世策機事不密為中常侍朱瑀等所殺此即陛下所見今宦官強盛威傾人主天下鉗口莫敢言者海內怨望妖孽竝作四方兵起萬姓辛苦陛下尚可以安柰後嗣何帝不省納出為巴郡太守年七十五卒臨終戒其子曰期運推之天下將大亂雄夫立爭無以貨財為意吾已依山薄葬三歲餘靈帝崩大將軍何進復為黃門所殺海內果亂終成三國也

孟度邵允 閻憲字孟度成固人也名知人為綿竹

令以禮讓為化民莫敢犯男子杜成夜行得遺物
一囊中有錦二十匹求其主還之曰縣有鬪君何
敢負其化童謡歌曰鬪尹賦政既明且袒去苛去
辟動以禮讓遷蜀郡吏民泣涕送之以千數

季子英瑋 李歷字季子太尉固從弟也廿修文學
性行清白與鄭康成陳元方齊名弱冠拜新城令
朝請都督

計君經筭 程苞字元道南鄭人也光和二年上計
史時巴郡板楯反軍旅數起征伐頻天子患之訪
問益州計考以方畧苞對言板楯忠勇立功先漢
為帝義民羗入漢中輒蒙其力東征南戰世有功

勞由不料卹以致叛亂非有僭盜能相群殺兵臨之未必卒得不如但遜嗣能太守恩信懷服自然安定矣天子從之卒如其言後在道卒

元靈斐斐 祝龜字元靈南鄭人也年十五遠學汝潁及太學通博蕩達能屬文太守張府君奇之曰吾見海內士多矣無如祝龜者也州牧劉焉辟之不得已行授葭萌長檉漢中耆舊傳以著述終

禮高殉名 段崇字礼高南鄭人太守河間鄭廩命為主簿永初四年涼州羌反溢入漢中從廩屯褒中虜東攻廩欲戰崇諫不可願固壘待之廩不聽出戰敗績崇與門下吏王宗原展及子勃兄子伯

生摧鋒歿戰衆寡不敵崇等皆以羗遂得塵殺之
伯義以節 程信字伯義南鄭人也時為功曹居守
馳來赴難殞殮塵喪送還鄉里訖乃結故吏冠蓋
子弟二十五人言共報羗各募敢死士以待時太
守鄧成命信為五官元初二年虜復來信等將其
同志率先奮計大破之信被八創歿天子咨嗟元
初五年下詔書賜信崇家穀數千斛

四行齊致在茲六子 讚閭憲已下也又有王崇原
展及嚴孝李容姜濟陳巳曹廉勾矩劉旌九人皆
以令義為鄭塵所命王宗原展與塵同以孝容等
七人與信共拜命詔書既賜崇信又賜九子家穀

各五百斛給以事復

元侯趙陳蓋亦烈士 燕邠字元侯趙嵩字伯高南

鄭人也陳調字元化仲卿孫也邠為刺史邠儉從
事使在葭萌與從事董馥張胤同行儉為黃巾賊
王饒趙播等所殺邠聞故哀慟說馥胤赴難二子
不可邠難曰使君已死用生何為獨死之牧劉焉
嘉之為圖象學官誅馥等嵩事太守蘇固固為米
賊張脩所疾殺嵩杖劍直入脩營殺十餘人焚獲
脩以陳調少尚遊俠聞固以張賓客百餘人攻脩
大破之進攻脩營乃與戰傷死

渙渙龍宗振振麟趾文炳彬蔚漢之表軌摠讚三十

五人也

述漢中人士 其陳術字申伯作者舊傳者也失其
行事歷新城魏興上庸三郡太守及錫光等不列也
穆姜温仁化繼為親 穆姜安衆令程祇妻司繇校
尉李法婦也祇前妻有四子興新觀豫穆姜生二
子淮基祇亡興等憎惡姜姜視之愈厚其資給六
子以長幼為差衣服飲食凡百如之久興等感寤
自知失子道詣南鄭獄受不愛親罪太守嘉之復
除門戶常以二月八日社致肉三十斤酒米各二斛
六斛六子相化皆作令士五人州郡察舉基字稚業
特雋逸為南郡太守

秦瑛嚴明世範厥訓 秦瑛南鄭楊拒妻大鴻臚劉

匡公女也有四男二女拒亡教訓六子動有法矩
長子元珍出行醉毋十日不見之曰我在汝尚如
此我亡何以帥群弟子元珍扣頭謝過次子仲珍
白毋請客既至無賢者毋怒責之仲珍乃革行交
友賢人兄弟為名士秦瑛之教流於三世四子才
官隆於先人故時人為語曰三苗止四珍復起

杜氏之教父母是遵 杜秦姬南鄭人趙宣女也生

七男七女若元珪稚圭有望五人皆令德其教男
也曰中人情性可上下也在其檢耳若放而不檢
則入惡也昔西門豹佩韋以自寬宓子賤帶絃以

自急故能改身之恒為天下名士戒諸女及婦曰
吾之倭身在乎正順及其生也恩存於撫愛其長
之也威儀以先後之體只以左右之恭敬以監臨
之勤恪以勸之孝順以內之忠信以發之是以皆
成而無不善汝曹庶幾勿忘吾法也後七子皆辟
察舉牧州守郡而漢中太守南鄭令多與七子同
歲季考上訂無不脩也秦姬執子孫禮

禮珪肅穆言存典韻

禮珪成固陳省妻也楊元珍

之女生二男長娶張度遼女惠英少娶荀氏皆貴
家豪富從婢七八資財自富禮珪教二婦曰吾先
姑母師也常言聖賢必勞民者使之思善不勞則

逸逸則不才吾家不為貧也所以麤食急務者使
知苦難備獨居時二婦再拜奉教從孫奉上微湯
珪抑絕之感悟輩行遭亂流行宗表欲見之必自
嚴飭從子孫侍婢乃引見之曰此先姑法也四時
祭禮自親養牲釀酒曰夫祭禮之尊也年八十九
卒惠英亦有淋訓母師之行者也

文姬睿敏宗祀獲敵 文姬南鄭趙伯英妻太尉李

固女也父為梁冀所免兄憲公季公罷官歸文姬

歎曰李氏滅矣乃與二兄議匿弟燮父門生王成

亡命徐州泮注送之謂成曰託君以六尺之孤若

李氏得嗣君之名義參於程杵矣久之遇赦燮得

還行喪服闋敕之曰先公爲漢忠臣雖歿之日猶
生之年梁冀以族弟幸濟豈非天乎慎勿有一言
加梁氏加梁氏則連主上是又撮禡也奉行之徒
成在徐州各異處傭賃而私相往來成病亡燹四
時祭之

陳氏二謙或智或仁 陳順謙成固人也順謙適鄧
令曹寧十九窻居長育遺孤八十餘卒兄子陳規
著書歎述之惠謙適張亮則在扶風官下吏白欲
重禁嚴防以肅非元脩訪於惠謙惠謙曰恢弘德
教養廉免恥五刑三千益亦多矣又何加也兄子
伯思學仙道惠謙戒之曰君子疾沒世名不稱不

患年不長也且夫神仙愚惑如繫風捕影非可得也伯思乃止陳伯臺稱云女尚書之後耳

禮脩順姑恩愛溫潤 禮脩趙嵩妻張氏女也姑酷

惡無道遇之不以禮脩終無愠色及寧父母父母問之但引咎不道姑卒感寤更慈愛之鄉人相訓曰作婦不當如趙伯高婦乎使惡姑知變可謂婦師矣後姑病女來省疾姑却之曰我以固當純于賢婦手中後遭未賊嵩外乃碧塗面亂首懷刀託言病賊不敢逼也養遺生女依父牀立義終身者也

樹南悼夫輕外重信 謝樹南南鄭人趙子賤妻也

子賤初為郡功曹李固之誅詔書下郡殺固二子
憲公季公太守知其枉遇之甚寬二子託服藥死
其棺器欲因出逃子賤畏法救更驗實就殺之及
固小子燹得還子賤慮燹報仇倩人刺之燹覺告
郡殺子賤初樹南諫子賤子賤不從及臨死許共
并命兄弟媪侍婢視守之經百餘日乃急白无媪
念一死萬不得生不敢復圖死也上下以為信然
無然時於幕下自殺

祁祁令姬如玉如金允矣淋媛齊德姜任懿讚此九
人也


述漢中列女

右漢中士女讚第五

凡四十四人

三十五人
九人女

賣衣買書志亦迂
愛護不異隨侯珠
有假不返遭神誅
子孫驚之何其愚



梓潼人士

鎮遠勳壯立勳南瀕 文瀕字奇梓潼人也孝平帝

末以城門校尉為犍為屬國遷益州太守開造稻
田民咸賴之公孫述時拒郡不服述拘其妻子許
以公侯招之不應乃遣使由交趾貢獻河北述平
世祖嘉之徵拜鎮遠將軍封成義侯南中咸為立
祠子忱有令德為北海太守

臣遊玉碎高風金振 李業字臣遊梓潼人也少執

志清白太守劉咸慕其名召為功曹不詣咸怒欲
殺之業徑入獄咸釋之公孫述累聘不應述怒遣
鴻臚尹融持毒藥酒逼之業笑曰名不可毀身可

殺不可辱也遂飲藥死述耻殺善士賜錢百萬子
翬逃匿不受建武中察孝廉為遂久令

文堅字執南面懷民 景毅字文堅梓潼人也太守

丁羽察舉孝廉司徒舉治劇為沈陽侯相高陸令
立文學以禮讓化民遷太守上封吏守闕請之三
年三絕以子顧師事少府李膺膺誅自免久之拜

都令遷益州太守上封吏民涕泣送之至沮者
七百人白水縣者三百人值益州亂後米斛千錢
穀至恩化暢洽比去米斛八錢鳩鳥巢其廳事孕
育而去三府表薦徵拜議郎自免歸州牧劉焉表
拜都尉為人廉止疾淫祠敕子孫惟修善為禱仁

義為福年八十一而卒

盛國好學研蹟聖真 楊克字盛國梓潼人也少好
學求師遂業受古學杖風馬季長呂紳公南陽朱
剛紳潁川白仲職精究七經其朋友則潁川荀慈
剛季元禮京兆羅紳景漢陽孫子夏山陽王紳茂
皆海內名士還以教授州里常言圖緯空說去事
希略疑非聖不以為教察孝廉為郎卒

漢伯肄業諸生之純

景鸞字漢伯梓潼人也少與

廣漢郝伯宗蜀郡任紳本潁川李仲勃海孟元紳
遊學七州遂明經術還乃撰禮略河洛交集風負
雜書月令章句凡五十萬言太守闕貺命為功曹

察孝舉有道博士徵不詣然上陳時政言經得失
又戒子孫人紀之禮及遺令期外葬不設衣衾務
在節儉甚有法度卒終布衣

伯僖劾志

張壽字伯僖涪人也少給縣丞楊放為

佐放為梁賊所得壽求之積六年始知其生存乃
賣家鹽井得三十萬市馬五匹往贖放道為羗所
劫掠盡凡往三年計道遠不可得數乃單身詣虜
涕泣自說虜哀其屢求遣放還鄉郡召為中候詔
書除巫尉以身佩印盡讓所有財物與三弟復為
郡掾章平賦後歲出三百五十萬還功曹吏徙五
官掾卒

李餘錢身 李餘涪人父早世兄夷殺人亡命母慎

當以餘年十三問人曰兄弟相代能免母不人曰

趣得一人耳餘乃詣吏乞代母以吏以餘年小不

許餘因自以吏以白令令哀傷言郡郡上尚書天

子與以財葬圖畫府庭 重人李餘涪人可考於先漢妻女目篇

寇王二子行勇以仁 寇祺字宰朝梓潼人也與邑

子侯募俱學涼州募後為勃海王象所殺祺杖劍

至象家值象病象謝曰君子不倦人無備安有為

友報讎煞病人也祺乃還久之復往煞象由是察

孝廉為灊陵令濟陰相王晏字林博涪人也與廣

漢張昌甯林受業大學昌為河南呂條所煞晏林

然條事在卦解

李昉多方以茲互稱 昉字翁君涪人也通名方校

醫術作經方頌說名齊郭玉自此以上以下關文義不可曉不詳

章武之興亦迪才倫德賢好古澹心藝文 李仁字

德賢涪人也益部多貴今文而不崇章句仁知其

不博乃游學荊州從司馬德操宋仲子受古學以

修文自終也

國輔皓然形動神沉 杜微字國輔涪人也任安弟

子先主定蜀常稱龍瞽闔門不出建興二年丞相亮

領州牧選為主簿輿而致之亮引見與書誘勸欲

使以德輔時微固辭疾篤亮表拜諫大夫從其所志

思潛遊學休志素林 尹默字思潛涪人也少與李

仁俱受學司馬徽宋忠等博通五經專精左氏春秋自劉歆條例鄭衆賈逵父子陳元方服虔注說略皆誦述希復案本以左傳授後主後主立拜諫議大夫丞相軍祭酒子宗亦為博士耳

欽仲即博訓詁典墳 李譔字欽仲仁子也少受父

業又講問尹默自五經四部百家諸子伎藝算計卜數醫術考考機械之巧皆致思焉為太子中庶子右中郎將著古文周易尚書毛詩三禮左氏注解太玄指依則賈馬異於鄭玄與王肅初不相見而意歸多同

孫德果銳作劉幹臣 李福字孫德涪人也先主初
為成都令建興九年遷巴西太守後為江州都督
揚武將軍入為尚書僕射封平陽亭侯延熙初以
前監軍司馬福同郡梓潼文恭仲賢亦以才幹為
牧亮治中從事丞相參軍

術術偉彥玉潤蘭芬邵名表器江漢之後摠讚十五
人也

述梓潼人士

季姜雍穆化播二婦王氏世興寔由賢母 季姜梓
潼文氏女將作大匠廣漢王敬伯夫人也少讀詩
禮敬伯前夫人有子博女紀流二人季姜生康稚

芝女始示凡前後八子撫育恩愛親繼若一堂祖母性嚴子孫雖見官二千石猶杖之婦跪受罰於堂歷五郡祖母隨之官後以年老不願遠鄉里姜亦常侍養左右紀流出適分已侍婢給之博好書寫姜手為作家於是內門相化動行推讓博妻健為楊進及博子遵婦蜀郡張村紀服姑之教皆有賢訓号之三母堂也姜教康稚芝婦事楊進如舅姑中外則之皆成令德季姜年八十一卒四男棄官行服四女亦從官舍交赴內外冠冕百有餘人當時榮之王氏遂世興

杜慈專專父不諒只 涪杜季女者巴郡虞頭妻也

十八適頭頭亡無子季欲改嫁與同縣楊上慈曰
受命虞氏虞氏早亡妾之不幸當生事贖姑以就
養成室存亡等但欲在終供養亡不有恨願不易
圖季知不可告而奪也乃密謀與彊逼迫之慈縊
而死

敬楊雪讎壯踰烈士

敬楊涪郭孟妻楊文之女也

始生失母八歲父為

關盛所殺無宗親依外祖鄭

行年十七適孟孟與盛有舊盛數往來孟家敬楊
涕泣謂孟曰盛凶惡薄命為女無男昆惡讎未報
未嘗一日忘也雖婦人拘制然父子恩深恐卒狂
惑益君禍患君宜踈之孟以告盛盛不納安漢元

年盛至孟家敬揚以大杖打殺盛將自煞孟止之
與俱逃涪令雙勝出追聞其故而止安尉二門會
赦得中平四年涪令向遵爲立圖表之

惟茲三媛仁暢義理邦有斯嬪以馳遐紀摠讚三人
述梓潼烈女

右梓潼郡士女讚第六

凡士女十八人

十五人士
三人女

譔曰二州人士自漢及魏二百四十八人而已

一百九十七人士五

十一人女後賢二十人合二百六十八人以示來世之君子

焉如其遺脫及後世可書者願貽後雋又春秋穀梁
傳首叙曰成帝時議立三傳博士巴郡晉君安獨駁

左傳不祖聖人後漢時魏郡太守王牧薦尹方爲三公天子詔尚書郎蜀郡張俊策之然不詳其行事

譔曰二州人士自漢及魏可謂衆矣何者世宗多士則相如麟遊伯司鳳翔洛下雲翳林文龍驤在孝宣則王褒蔚炳中和作詠屬文甘泉葩爲世鏡在元成則君公蹇蹇心思國病慮經劉危直忤王聽其高者則嚴君味道易俗移風仲元端委居爲人宗若夫秉心塞淵與物盈冲則揚子雲也名重泰山華夏仰崇則鄭子真也不屈其身志高青雲則譙玄也不恥惡君混道推運則楊宣也降及建武明章以來出者則能內貫朝揆外播五教贊和鼎味經綸治要上答泰

階下允民照處者則利居槃桓皓然玄蹈天爵玩之
人爵則笑懸車門肆夷惠齊紹若斯之倫海內服其
英名洙泗方其漁耀矣故曰漢徵八士蜀出其四又
曰漢具四義蜀遜其二可謂不衆乎然巴郡冒君安
以儒學典雅稱於孝成蜀郡張俊策問尹方不出五
經常議犍為呂孟有託孤之節若茲之類郡邑徃徃
垂象刊銘見有苗裔璩晚生長亂故老以沒莫所咨
質不詳其事但依漢書國志陳君所載凡士女二百
四十八人而已後賢二十人合二百六十八人以示
來世之好事者如能詳其遺脫及有可書願附于左
其傳志父祖子孫及有名失事失官位者不列寧

州人士亦不列別為目錄至晉元康末凡三百九
十二人也

華陽國志卷第十之下



華陽國志卷第十一

後賢志

聞之善志者述而不作序事者實而不華是以史遷之記詳於秦漢班生之書備乎哀平皆以世及事邇可得而言也西州自奉聖晉後俊瑋倜儻之士或脩德讓行止從時或播功立事羽儀上京策勳王府甄名史錄侔於先賢會遇喪亂輒遺華夏顛墜典籍多缺族祖武平府君愍其若斯乃操簡援翰拾其遺闕然但言三蜀巴漢未列又務在舉善不必珍異揆之耆舊竹素空闌今更撰次損益足銘後觀者凡二十人綴之斯篇雖行故墜沒大較舉其一隅

衛尉散騎常侍文立廣休
散騎穆穆誠感聖君

西河太守柳隱休然

西河烈烈秉義居真

漢嘉太守司馬勝之興先

漢嘉克讓謙德之倫

郫令州主簿常勗修業

郫君蹇諤自固底身

江陽太守何隨季業

江陽皎皎命世清瀟

梓潼太守王化伯遠

梓潼矜矜在險能平

太子中庶子陳壽承祚

庶子稽古遷固竝聲

漢中太守李寔令伯

漢中驍暉才益羣生

捷為太守杜軫起宗

捷為印印友于寔令

給事中任熙伯遠

給事溫恭尚德茂榮

中書郎王長文德雋

中書涖識寶道韜剛

大長秋壽良文淵

長秋忠肅明允篤誠

大司農西城公何攀惠興

司農運籌思侔良平

少府成都侯威李教允剛

少府果壯文武是經

衡陽內史楊邠岐之

衡陽固節隱然不傾

尚書三州都費立建熙

尚書準繩古之遺直

湘東太守常騫季慎

湘東汜慶仁以接物

武平太守常寬恭恭

武平亶亶冰清玉嶷

揚烈將軍梓潼內史巴西譙登

江陽太守江陽侯馥

文立字廣休巴郡臨江人也少遊蜀太學治毛詩三
禮兼通羣書州刺史費禕命為從事入為尚書郎復
辟禕大將軍東曹掾稍遷尚書蜀并于魏梁州建首
為別駕從事咸熙元年舉秀才除郎中晉武帝方欲
懷納梁益引致雋彥泰始二年拜立濟陰太守武帝
太子以司徒李胤為太傅齊王驪為少傅選立為中

庶子立上疏曰伏惟皇太子春秋美茂盛德日新
始建幼志誕陟大繇猶朝日初暉良寶耀璞侍從
之臣宜簡俊入妙選賢彥使視觀則覩禮容棣棣之
則聽納當受嘉話駭耳之言靜應道軌動有所采佐
清初陽緝熙天光其任至重聖王詳擇誠非蠢朽能
可堪任臣聞之人臣之道量力受命其所不諧得以
誠聞帝報曰古人稱與田蘇遊非舊德乎立上故蜀
大官及盡忠死事者子孫雖任郡國或有不才同之
齊民為劇又上諸葛亮蔣琬費禕等子孫流徙中畿
宜見叙用一則以慰巴蜀民之心其次傾東吳士人
之望事皆施行十年詔曰太子中庶子立忠貞清實

有思理器幹前在濟陰政事修明後事東宮盡輔導
之節昔光武平隴蜀皆收其才秀所以援濟殊方仲
叙幽滯也其以立為散騎常侍累辭不許上疏曰臣
子之心願從疏以求眚凡在人情貪從出以致明斯
實物性賢愚所同臣者何人能無此懷誠自審量邊
荒遺燼犬馬老甚非左右機納之器臣雖至愚處之
何顏詔曰常伯之職簡才而授何謙虛也立自內侍
獻可替否多所補納甄致二州人士銓衡平當為士
彥所宗故蜀尚書掾為程瓊雅有德望素與立至厚
武帝聞其名以問立立對曰臣至知其人但年垂八
十稟性謙退無復當時之望不以上聞耳瓊聞之曰

廣休可謂不黨矣故吾善夫人也西界獻馬帝問立
馬何如對曰乞問太僕帝每善其恭慎遷衛尉猶兼
都職中朝服其賢雅為時名御連上表年老乞求解
替還桑梓帝不聽咸寧末卒帝緣立有懷舊性乃送
葬于蜀使者護喪事郡縣修墳塋當時榮之初安樂
思公世子早歿次子空嗣而思公立所愛者立亟諫
之不納及慶子立驕暴二州人士皆欲表廢立止之
曰彼自暴其一門不及百姓當以先公故得爾也後
安樂公淫亂無道何攀與上庸太守王崇涪陵太守
張寅為書諫責稱當思立言凡立章奏集為十篇詩
賦論頌亦數十篇同郡毛楚楊崇皆有德美楚牂柯

崇武陵太守

柳隱字休然蜀郡成都人也少與同郡杜祺柳仲茲知名隱直誠篤亮交友居厚達於從政數從大將軍姜維征伐臨事設計當敵陷陣勇畧冠軍為牙門將巴郡太守騎都尉遷漢中黃金圍督景耀六年魏鎮西將軍鍾會伐蜀入漢川圍成多下惟隱堅壁不動會別將攻之不能克後主既降以手令敕隱乃詣會晉文帝聞而義之咸熙元年內移河東拜議郎武帝踐祚以為西河太守在官三年以年老去官乞骸還蜀卒於家年八十長子亮連道令次子初舉秀才

杜祺字文然

柳仲字雅厚州牧諸葛亮辟為從事

祺符節令梁益二州都督仲度支祺子珍字伯重略陽護軍仲漢嘉巴東太守大同後立舉秀才珍子彌字景文仲子純字偉淋有名德幹器舉秀才巴郡父都建平太守西夷長水校尉巴東監軍

司馬勝之字興先廣漢綿竹人也學通毛詩治三禮清尚虛素性澹不榮利初為郡功曹甚善綱紀之體州辟從事進尚書左選郎徙秘書郎時蜀國州書佐望與郡功曹參選而從事侔臺郎時重察舉雖位經朝要還為秀孝亦為郡端右景耀末郡請察孝廉大同後梁州辟別駕從事舉秀才歷廣都新繁令政理尤異以清秀徵為散騎侍郎以宗室禮之終以疾

辭去職即家拜漢嘉太守候迎盈門固讓不之官間
居清靜謙卑自牧常言世人不務求道德而汲汲於
爵祿若吾者可少以為有餘榮矣訓化鄉閭以恭敬
為先年六十五卒於家子尊賢佐皆有令德

常勗字修業蜀郡江原人也祖父負牂柯永昌太守
父高廟令從父閔漢中廣漢太守勗少與閔子忌齊
名安貧樂道志篤墳典治毛詩尚書涉治羣籍多所
通覽州命辟從事入為光祿郎中主事入為尚書左
選郎郡請迎為功曹時州將董軍政置從事職典刑
獄以勗清亮復為督軍治訟平當還察孝廉除郡令
為政簡而不煩魏征西將軍鄧艾伐蜀破諸葛瞻於

綿竹威振西土諸縣長吏或望風降下或委官奔走
最獨率吏民固城拒守後主檄令乃詣艾故郫毅帛
全完刺史表郫嘉最志節辟為主簿最善儀容翔集
動為表觀言論壯烈州里重之然交友惟賢不交下
已者汎愛之恩猶不足郫徵還道卒 忌字茂通蜀
謁者黃門侍郎喪親以致孝聞察孝廉為郎使吳稱
職歷長水參軍什邽雒令大同後刺史郫坐治城被
徵忌詣洛陳訴遠國初附居民始結不宜改易又表
修治城池居安思危邊將常職事皆中情晉文帝時
為相國辟忌舍人武帝踐祚拜騎都尉除河內令州
名為難治忌挫折豪勢風教大行縣有姦婢殺兄者

羣黨蔽匿前令莫得忌皆窮治入為州都方議為郡
守會卒忌為人信道任數不從下人故為貴勢所不
善是以作詩著論先攻已短臨喪與樂歡哀俱至為
士類所稱忌友人廣漢段宗仲亦有學行蜀時官與
忌比表邵為主簿與忌共理郡事文帝善之梁州辟
別駕從事舉秀才稍遷官至雲南建寧太守

何隨字季業蜀郡郫人也漢司空武後世有名德徵
聘入官隨治韓詩歐陽尚書研精文緯通星歷郡命
功曹州辟從事光祿郎中主事除安漢令蜀亡去官
時巴土飢荒所在無穀送吏行乏輒取道側民芋隨
以綿繫其処使足所取直民視芋見綿相語曰聞安

漢清廉行過從者無糧必能爾耳持綿追還之終不受因為語曰安漢吏取糧令為之償察孝廉大同後臺召不詣除河間王郎中令不就居貧固儉衣弊蔬食晝躬耕耨夕修講諷鄉族饋及禮厚皆不納目不視色口不語利著譚言十篇論道德仁讓嘗有屠宰猪過隨門猪索斷失之強認溷中猪隨便牽猪與之屠人出門尋得其所亡猪謝隨還猪遂以乞之有家巷竹園人盜其笋隨遇行見之恐盜者覺怖走竹中傷其手足挈屐徐步而歸其仁如此太康中即家拜江陽太守民思其政年七十一卒官後州鄉人言議平當者皆相謂何江陽至于文山夷有正直廉讓者

亦號夷中

何江陽杜景文何興仁皆為作傳

長子觀字巨忠清公淋慎知名州里察孝廉西都南安令平西長史張昌作亂荊州從黨西上郡守無不望風降下至江陽平西將軍羅尚表為安遠護軍討賊平珍除巴郡太守朝議欲以為寧州刺史會病卒次子遊治中從事隨時同郡繁令張崇清廉推讓見稱當時

王化字伯遠廣漢郫人也漢將作大匠王堂後也祖父商字文表州牧劉璋時為蜀太守有懿德高名在著舊傳父彭字仲巴郡太守化兄弟四人少有令望化治毛詩三禮春秋公羊傳郡命功曹州辟從事光

祿郎中主事尚書郎除閩中令為政清靜察孝廉大
同後復端右郡察孝廉為樂道令縣近邊塞值胡虜
反化率吏民積穀堅守虜斷道重圍孤絕七年伺虜
怠惰出軍討之民得野掠大軍至虜退以功封關內
侯遷朱提太守撫和殊俗得夷晉懽心轉在梓潼復
有稱績為人嚴重言論方雅臧否允衷州里服其誠
亮年七十二卒官弟振字仲遠亦有德望廣都令巴
東太守弟斌字季遠恪居官次歷廣陽作唐令早
亡少弟崇字幼遠學業淵博雅性洪粹蜀時東觀郎
大同後梁州辟別駕別舉秀才尚書郎與壽良李述
陳壽李驥杜烈同入京洛為二州標雋五子情好未

必能終惟崇獨以寬和無所彼此著蜀書及詩賦之屬數十篇其書與陳壽頗不同官至上庸蜀郡太守

陳壽字承祚巴西安漢人也少受學於散騎常侍譙

周治尚書三傳銳精史漢聰瞻敏識屬文富豔初應

州命衛將軍主簿東觀秘書郎散騎黃門侍郎大同

後察孝廉為本郡中正益部自建武後蜀郡鄭伯邑

大尉趙彥信及漢中陳申伯祝元靈廣漢王文表皆

以博學洽聞作巴蜀耆舊傳壽以為不足經遠乃并

巴漢撰為益部耆舊傳十篇散騎常侍文立表呈其

傳武帝善之再為著作郎吳平後壽乃鳩合三國史

著魏吳蜀三書六十五篇號三國志又著古國志五

十篇品藻典雅中書監荀勗令張華深愛之以班固
史遷不足方也出為平陽侯相華又表令次定諸葛
亮故事集為二十四篇時壽良亦集故頗不同復入
為著作郎鎮南將軍杜預表為散騎侍郎詔曰昨適
用蜀人壽良具負且可以為侍御史上官司論七篇依
據典故議所因革又上釋諱廣國論華表令勗中書
郎而壽魏志有失勗意勗不欲其處內表為長廣太
守繼母遺令不附葬以是見譏數歲除太子中庶子
太子傅從後再兼散騎常侍惠帝謂司空張華曰壽
才宜真不足久兼也華表欲登九卿會受誅忠賢排
擯壽遂卒洛下位望不充其才當時寃之 兄子符

字長住亦有文才繼壽著作佐郎上廉令符弟位字

琳度梁州別駕驃騎將軍齊王辟掾卒洛下 荏從

弟階字達芝州主簿察孝廉襲中令永昌西部都尉

建寧興古太守皆辭章燦麗馳名當世凡壽所述作

二百餘篇符荏階各數十篇二州先達及華夏文士

多為作傳大較如此時梓潼李驥并龍亦高逸器知名當世舉秀才尚書郎拜建章太守以疾辭不就意在州里除

廣漢太守初與壽齊望又相昵友後與壽情好攜隙還相誣攻有識以是短之亦自別傳

李宓字令伯犍為武陽人也祖父光朱提太守父早

亡母何更行見養祖母治春秋左傳博覽五經多所

通涉樛髻辯捷辭義響起事祖母以孝聞其侍疾則

泣涕側息日夜不解帶饍飲湯藥必過目嘗日本郡

禮命不應州辟從事尚書郎大將軍主簿太子洗馬
奉使聘吳吳主問蜀馬多少對曰官用有餘民間自
足吳主與群臣汎論道義謂寧為人弟宓曰願為人
兄吳主及群臣稱之大同後征西將軍鄧艾聞其名
請為主簿及書招欲與相見皆不往以祖母年老心
在色養拒州郡之命獨講學立旌授生武帝立太子
徵為洗馬詔書累下郡縣相逼宓上疏疏本傳武帝覽
之曰宓不空有名也嘉其誠款賜奴婢二人下郡縣
供其祖母奉膳徒尚書郎河內温令敷德陳教政化
嚴明太傅鉅平侯羊公蒙無子帝令宗子為世子嗣
之不時赴喪宓遣戶曹賈移推轂遣之中山諸王每

過溫縣必責求供給吏民患之宐至中山王過縣徵芻茭薪蒸宐引高祖過沛宐老幼桑梓之供一無煩費伏惟明王孝思惟則動識先戒本國望風式歌且舞誅求煩碎所未聞命後諸王過不敢煩溫縣盜賊發河內餘縣不敢近溫追賊者不敢經界隴西王司馬子舒深敬友之而貴豪憚其公直宐去官爲州大中正性方亮不曲意勢位者失荀張指左遷漢中太守諸王多以爲宐一年去官年六十四卒著述理論論中和仁義儒學道化之事凡十篇安東將軍胡羆與皇甫士安深善之又與士安論夷齊及司馬文中杜起宗郗令先文廣休等議論往返言經訓詰衆人

服其理趣釋河內趙子聲談詩賦之屬二十餘篇壽
良李驥與陳承祚相長短宓公議其得失而切責之
常言吾獨立於世顧景爲疇而不懼者心無彼此於
人也故宓六子皆英挺秀逸號曰六龍長子賜字
宗碩州別駕舉秀才汶山太守少與東海王司馬元
超友昭每書詩往返雅有新聲少子興字雋碩太傅
參軍幼子盛碩寧浦太守宓同時蜀郡高玩字伯
珍少受學於太常杜瓊術藝微妙博聞強識清尚簡
素少與宓齊名官位相比大同後察孝廉除曲陽令
單車之縣移檄縣網紀不使遣迎以明三材徵爲太
史令送者亦不出界朝廷稱之方論大用會卒

杜軫字超宗蜀郡成都人也父雄字伯休安漢雒令軫少師譙周發明高經於譙氏之門郡命為功曹鄧艾既破蜀被徵鍾會進成都時太守南陽張府君不肯出官軫進曰征西囚執鎮西在近必有所遣軍亂之際交害無常互避正殿府君即出住下舍會果遣參軍牽弘為太守數百騎擐甲馳馬入郡前驅問侯所在云已出善之引復召為功曹察孝廉除建寧令徙任山陽新城池陽所在有治入為尚書郎每升降趨翔廊閣之下盛容可觀中朝偉之遷捷為太守惠愛在民還為州大中正軫既才學兼該而器量侷儻武帝雅識之方用內侍會卒時年五十八弟烈字

仲武貞幹敏識平坦和粹名譽倬軫察孝廉歷平康
牛鞞南鄭安陽令王國建首選為郎中令遷衡陽太
守兄軫喪自上求去官以兄子幼弱軫喪飄飄欲扶
將靈柩葬舊墳武帝歎惜軫能用未盡而嘉烈弟意
轉拜徙官犍為太守又轉湘東少弟良字幼倫亦
有當世局分舉秀才茶陵新都令國王郎中令遷涪
陵建寧太守兄弟並興州里以為美譚軫二子長
子毗字長基少子秀字彥穎圭璋琬琰世号二鳳毗
舉秀才大將軍辟掾太傅參軍平東長史尚書郎稍
遷鎮南軍司益州刺史主簿早卒

任熙字伯遠蜀郡成都人也漢大司徒任方後也妻

有德彥父元字秀明捷為太守執金吾熙治毛詩京
易博通五經事親至孝居喪毀瘠為州鄉所稱察孝
廉除南鄭令以病去官復授南鄭不就轉梓潼令為
政清淨辭疾告歸勤農力穡居室致給循訓闔門內
則可法博愛以謙恭接物開門待賓傾懷下士客無
長幼必有供饌清談遊講不妄失言祇慎著聞太康
中除越雋護軍非其雅好不往徵給事中熙以待臣
日月左右贊暉揚光不可苟私終以疾辭而蜀郡令
每至官為之修謁歲致羊酒即家拜朱提太守固讓
不之官好述作詩誄論難皆燦豔年六十九卒於家
子蕃字憲祖察孝廉新都令西夷司馬涪陵太守蕃

子迪字耕孤少與巴西龔壯俱知名而學業優之早
致熙同時捷為楊壺敬宗弟達訓宗各以德行稱同
察孝廉壺比蘇令甘露降其縣達滇池令殊俗懷其
德

王長文字德雋廣漢郫人也父顯字伯元捷為太守
長文天姿聰警高暢敏識治五經博綜群籍弱冠州
三辟書佐丁時興哀託疾歸家大同後郡功曹察孝
廉不就遂陽愚常着絳衣絳帽牽猪過市中乞人與
語偽不聞常騎牛周旋郡初至詣門修敬至問走出
請終不還刺史淮南胡羆辟從事祭酒臥在治羆出
版舉秀才長文陽發狂疾步擔走出門羆累遣教請

還終不顧還家養母獨講學著無名子十二篇依則
論語又著通經四篇亦有卦名擬易玄以為春秋三
傳傳經不同每生訟議乃擬經撰傳著春秋三傳十
三篇又撰約禮記除煩舉要凡十篇皆行於時長文
才鑿清妙汎愛廣納放蕩闊達不以細互廉分為意
亦不好臧否人物故時人愛而敬之以母欲祿養咸
寧中領蜀郡太守郫有孝子羅偶事親至孝二親將
亡時病不能食肉終身不食肉郡察孝廉長文追為
立表以旌之宰府辟三司撫及軍大將軍王濬累辟
不詣濬薨以故州將軍弔祭元康初試守江原令縣
收得盜賊長文引見誘慰時適臘晦皆遣歸家獄先有

繫囚亦遣之謂曰教化不厚使汝等如此長吏之過也錯節慶祈歸就汝上下善相懽樂過節來還當爲思他理羣吏惶遽爭請不許尋有敕令無不感恩所宥人輒不爲惡曰不敢負王君將喪去官民思其政大將軍梁王彤及諸府竝辟長文曰吾從其先命者遂應彤招爲從事中書郎諸王公卿慕其名咸與之交賈氏之誅從彤有功封關內侯再爲中書郎愍懷太子死於許下博士中書論虞祔之禮長文議虞祭宜還東宮以繼太子者爲主配食於潁川府君皆施行除洛陽令長文見彤曰主者不庶矣奏長文爲洛陽令彤笑答曰卿乃不庶矣非主者也固辭不拜

聞益州亂以通經筮得老蠶緣枯桑之卦歎曰桑
無桑蠶以卒也吾蜀人殄於是矣拜蜀郡太守暴疾
卒時年六十四長文時人蜀郡柳竺任興亦博學著
聞俱為州別駕竺在右職公亮蹇蹇刺史盛怒欲殺
人羣下請不聽竺乃懷縛徑入頓几上乃極陳其刑
理刺史從謝還縛聞

皆早亡下作長久

壽良字文琳蜀郡成都人也父祖二世犍為太守良
少與犍為張衡費緝並知名治春秋三傳貫通五經
澡身貞素州從事散騎黃門侍郎大同郡主簿上計
更察孝不就州辟主簿治中別駕舉才行刺史皇甫
晏貢之三司遂辟太宰除霸城令始平太守治政著

稱從扶風轉秦國內史文立卒後溫令李實表武帝
言二州人士零頽才彥凌遲無復厠豫綱紀後進慰
寧遐外者良公朝在時二州之望宜見超子紹繼立
後帝徵為黃門侍郎兼二州都給事中梁州刺史遷
散騎常侍大長秋卒葬洛北芒山 徵字建興張翼

子也篤志好學官至廣漢太守 緝字文平清檢有

治幹舉秀才歷城令涪陵太守遷譙內史

良公朝疑誤

何攀字惠興蜀郡郫人漢司空汎鄉侯武弟潁川太
守顯後也父色字休揚察舉孝秀皆不行除瑯琊王
中尉不就攀兄弟五人皆知名攀少夙成竒姿卓逸
弱冠郡主簿上計吏州辟從事刺史王 晏稱攀王

佐才也以為主簿秦始皇十年養母歸家晏為牙門張

弘等所害攀操表詣洛社訟釋事得清刺史王濬復辟

主簿別駕咸寧三年濬被詔罷屯田兵作船為伐吳

調攀進曰今見佃兵但六百人計作船六七年財可

勝萬人後者未成前者已腐無以輔成國意宜輒召

四守休兵及諸武吏并萬餘人造作歲終可辦濬及

綱紀疑輒及萬兵欲先上須報攀曰官家雖欲伐吳

疑者尚多卒聞召萬兵必不見聽以佃兵作船船不

時成當輒召以速為機設當見却功夫已成勢不得

止濬之議欲入山裁船動數百里艱難攀曰今冢墓

多種松柏當什四市取以速為機濬悅之任攀典舟

船器仗冬遣攀使洛攀曰聖人之功可成使人信之不可必也夫高祖之大略猶未察於韓信盡敬因蕭何子房而後用之今建非常之功或莫之信羊公使君同盟國家所重加曩日失策江陵思有風駕宜與相聞此一助也濟曰何但羊姊子亦宋元亮之憂君至洛官家未有舉意便前襄陽與羊宋論之攀既至洛拜表獻策因至荊州與刺史宋遵論宋未許乃見羊祐累日共畫用兵之要攀曰若令循清海以趣京下壽春揚州直指秣陵充豫踰海竝據桑浦則武昌以東會稽以西騷然駭矣荊州平南徑造夏口巴東諸軍固守西陵益梁之衆乘浮江東下封樂鄉要巴丘

則武陵零桂長沙湘東從風而靡矣但明信賞首尾
俱會旌旗耀天四面雲合乘檝席卷傳檄南極吳會
不盡平者未之有也羊祜大悅遂表請伐吳尋徵濟
大司農至晉壽詔以濟為龍驤將軍除攀郎中參濟
軍事攀頓奉使詣洛時未婚司空裴公竒其才以女
妻之五年秋攀使在洛安東將軍王渾表孫皓欲北
上邊戍警戒朝議征却須六年攀上䟽策皓必不敢
出宐因令戒嚴掩取甚易中書令張華命宿下舍設
諸難攀皆通之又濟性在忠烈受命必果宐重其位
號詔書遷濟平東將軍督二州事吳平封關內侯濟
入拜輔國攀為司馬上論時務五篇除棗陽令進廷

尉評有盜開城門下關者法據大辟攀駁之曰上關
執信之主下關儲備之物設有開工闕何以加刑遂
減死多所議讞遷散騎侍郎太傅楊駿謀逆請衆官
攀與侍中傅祗侍郎王愷等往惠帝從楚王瑋殿中
中郎孟觀策戒嚴誅駿外已忽忽攀與祗踰墻得出
侍天子天子以為羽軍校尉領熊渠兵一戰斬駿
社稷用安封西城公邑萬戶策曰於戲在昔先王光
濟厥世罔不開國列土建德表功也故逆臣楊駿謀
危社稷構兵飛矢集于殿庭白刃交於宮闈攀受命
奮討凶逆殄忠烈果毅朕甚嘉焉今以魏興之西
城為攀封國錫絃玄社苴以白茅永為晉藩輔往欽

執敬乃有土惠康黎元無或以隳爾顛烈又賞絹萬匹攀固辭受五千匹又賜拜弟逢平鄉侯兄子夔開內侯遷宣闕內史不就轉東莞校尉西虜寇邊遣長史楊威討之違攀指受失利徵還領越騎校尉武庫災百官皆赴火攀獨以兵衛宮復賜絹五百匹領河南尹遷揚州刺史假節在官數年德教敷宣征虜將軍石崇表東南有兵氣不宜用遠人徵拜大司農兼三州都自表以被疾錯忌不堪銓量人物讓都職於任熙嘗緝不聽遷兗州刺史錫寶劍赤舄固辭不之官時帝室政衰多害忠直又諸王迭起好結黨徒攀闔門治疾不與世務朝議欲以為公會蒙時年五

十七天子慈悼追贈司印綬謚曰桓公遺令敕世子
務行恭儉引荀公曾諸葛林為模範子璋嗣

李毅字允剛廣漢郫人也祖父朝字偉南州別駕從
事父旦字欽宗光祿郎中主事毅少散達不治素檢
年二十餘乃詣郡文學受業通詩禮訓詁為學主事
太守弘農王濬臨學講試問祭酒姬豔曰學中有可
成進矣百人豔對曰可有百人濬怒曰童冠八百而
成者百人教少何為毅對曰如豔之言明府之教盛
於孔氏不為少也濬奇之命為主簿濬嘗夢得三口
刃云人以禾益之手持不得以問郡丞與掾史莫能
知毅對曰吉祥也三刃者州字而益之禾持不得禾

傍失者秩字明府秩當至孟州濟笑曰如卿言當相
以爲秀才張弘殺益州刺史皇甫晏誣表晏反毅白
濟曰皇甫侯起自諸生位極方州又當何求且廣漢
與成都密爾而統梁州者矜益州之領須防若今日
也益州有禍乃此郡之憂加張弘小豎衆所不與互
時赴討濟欲先上後行毅曰大夫出疆苟利社稷專
之爲賢何凡殺主賊急當不拘常互濟從之發兵與
牙門滿泰等共討弘斬之詔書遷濟益州刺史毅復
爲州主簿別駕舉秀才及濟伐吳與何攀竝爲參軍
吳平封關內侯除隴西護軍以疾去官徙繁令遷雲
南太守濟臨夢上表後武帝思濟勲問毅所在徙犍

為使持節南夷校尉久之捷為民毛詵李叡與朱提
民李孟共逐太守杜俊雍約以叛眾數萬毅討破之
斬詵孟首叡走依五荼夷亦叛晉朝復置寧州以毅
為刺史加龍驤將軍封成都縣侯夷遂大反破沒郡
縣攻圍州城中原亂而李雄寇蜀救援不至疾病夢
於窮城懷帝嘉其忠節追贈少府謚曰威侯毅性通
博居情雅厚賑卹寒貧篤於故舊人咸歸之但好談
調德重猶少從弟苾字对平少修身砥厲名行數
諫毅互自矜嚴毅笑應之曰吾小來不治名素終杖
旄節故可至九卿卿清儉履道卒不失成都令也時
毅始受南夷而苾歷城令果作成都遷捷為太守位

官不及教教子釗世秉儒學有格望以父任為謁者
除壽林侯相不就為尚書外兵郎自表赴難至祥柯
夷斷道不得進經年以寧州城中無穀父疾病未知
吉凶不食穀惟茹草迄至奔喪官至朱提越雋太守
西夷校尉教女秀適漢嘉太守新都王載有才智父
亡後州文武推領州三年二州當太清中位至方州
節將者壽良何攀及教永嘉中巴張奕希祖為荊州
刺史南蠻長水校尉蜀郡張峻紹茂為監南中八部
事西夷校尉持節事

楊邠字岐之捷為武陽人也少好學志古藻厲名行
州辟主簿別駕刺史王濬舉秀才安漢雖令國王中

尉以選為尚書郎遷汶山太守值夷復讎失殊俗和
徙授巴東轉廣漢永嘉初進衡陽內史遇流民叛亂
攻沒長沙湘東邠輟救匪賊衆浸盛遂破郡城獲邠
欲以為主邠不許賊晝夜執守邠候其小息夜急走
比覺已去遠收餘衆軍重安欲投湘州刺史荀眺共
圖進取會眺降賊邠孤軍固城賊攻圍之誓死不移
遂卒城中時年六十九帝為鎮東大將軍嘉其忠節
死義大使弔贈策曰惟永嘉七年四月己未使持節
都督江陽諸軍事鎮東大將軍瑯琊王睿謹遣版命
前衡陽內史楊君忠肅身固守正不移雖危逼節義
可嘉不幸殞卒孤城甚悼之今列上尚書贈君淮南

內史魂而有靈嘉茲寵榮哀哉

邠同郡楊稷文曹泰始初為交趾太守平九真鬱林日南

四郡斬吳交州刺史劉俊大將軍備則武帝方授交州會孫皓遣大將薛瑁隨璜十萬人攻稷被攻八月救援不至衆寡不敵遂為瑁璜所獲因稷

欲以送皓稷斷血歿帝嘉其忠烈發命追贈交州刺史也

費立字建熙犍為南安人也父揖字君讓巴西太守

立學義沖邃玄靜沉嘿察孝廉王國中尉王年少好

輕行遊觀立常正色匡諫及上疏風喻詞義劇切合

箴規之體出為成都令縣名難治立莅之垂績以性

公亮入為州大中正除巴西太守不就轉梁益寧三

州都督兼尚書值大駕西幸長安常與大臣居守在

洛加負外散騎常侍封關內侯每准正三州人物品

格褒貶帥意方矩無復踈親莫不畏敬然委曲者多

恨其繩墨數辭諸郡意在河秦汝潁久之朝議欲以
為荊州永嘉六年與子并歿於胡寇立時漢國呂毅
林偉德以清彦辟別舉秀才尚書郎秦國內史長水
校尉負外常侍梁州都督與立同歿胡寇

常騫字季慎蜀郡江原人也祖父竺字代文南廣太
守侍中祖偉字公然閬中令騫治毛詩三禮以清尚
知名州辟部從事主簿郡請功曹察孝廉萍鄉令以
選為國王侍郎出為綿竹令國王歸之復入為郎中
令從王起義有功封關內侯遷魏郡太守加材官將
軍以晉政衰觀中原不靜固辭去官拜新都內史時
蜀亂民在流在荆湘徙湘東太守疾病未拜卒年六

十八騫性汎愛敦敬友宗族當官修理怒以撫物好
咨問動必謙讓州鄉以為儀範二州清官見述者先
有互都太守犍為唐定義業隴西太守巴西馮公休
翊而後騫云

常寬字恭恭騫族弟郡令勗弟子也父廓字敬業以
明經著稱早亡闔門廣學治毛詩三禮春秋尚書尤
耽意大易博涉史漢疆識多聞而謙虛清素與俗殊
務郡命功曹及察孝廉不就州辟主簿別駕舉刺史
羅尚秀才為侍御史除繁令隨民安縣零陵以舉將
喪去官湘州叛辭乃南入交州交州刺史陶咸表為
長史固辭不之職雖流離交城衣弊襜褕冠皮冠乘

牛徃來獨鳩合經籍研精著述依孟揚宗盧師矩著
典言五篇撰蜀後志及後賢傳續陳壽耆舊傳作梁
益篇元帝踐祚嘉其德行潔白拜武平太守民悅其
政以榮貴非志在官三年去職尋梁碩作亂得免難
卒於交州凡所著述詩賦論議二十餘篇子長生字
壺祖亦有學行州主簿資中令治中從事早亡時蜀
郡太守巴西黃容亦好述作著家訓梁州巴紀姓族
左傳抄凡數十篇漢嘉太守蜀郡杜龔敬修亦著蜀
後志及志趙廩李特叛亂之事及喪紀禮式後生有
取焉

譙登字慎剛巴西充國人譙周孫也仲父熙察孝

廉本郡大中正沔陽令耕父同字彥紹少知名振州郡之命梁州刺史壽良與東羗校尉何攀貢之三司及大將軍幕府為尚書郎除錫令亦有為作傳者

登少以公亮義烈聞郡命功曹州辟主簿別駕從事領陰平太守郡五官素大姓豪擅侵凌羗晉登誅之郡中皆肅後以李特作亂本郡沒寇父為李雄巴西太守馬脫所殺乃東詣鎮南劉公請兵時中原亂守公三年不能得兵表拜楊烈將軍梓潼內史使合義募巴蜀流士得二千人鎮西將軍羅尚以退住巴郡登凡募登從尚索益軍討雄不得乃徃攻宕渠斬脫食其肝巴西賊破復詣尚求軍尚參佐多以必無利

登憤恚數凌折之又加責於尚尚但下之而已會羅
義殺雄太尉李離舉梓潼來降登徑進涪城雄自攻
登爲登所破而尚將張羅進屯犍爲之合水文碩殺
雄太宰李國以巴西降羅遣軍掠廣漢破雄封父驥
虜其妻子募人斫雄頭賊以向困而尚本參佐恨登
之見矜侮不供其軍食益州刺史皮素至巴東救平
西送故遣將張順楊顛救登至墊江素遇害順顛還
雄知登乏食遣驥致攻兵窮士餓誓死不退衆亦餓
死而無去者永嘉三年爲驥所生得與登致雄言辭
慷慨涕泣獻款無服降臣折情雄乃殺之囚其軍士
皆以爲奴虜畀兵士而連陰雨百餘日雄中以登爲

枉而所領無辜怒氣感天下救出登軍士湮沒者
初尚之在成都也與雄攻戰郫令犍為張昕欽明每
摧破雄雄衆憚之而救助不能并心為雄所殺雄常
言羅尚將均如張昕吾輩族早無遺矣 時牙門左
汜亦有戰功尚不能益其兵穀汜恚恨以毋喪歸尚
累召不往尚怒曰微左汜當不滅賊乎遂殺之雄聞
汜死大小相賀 登同郡縣李高亦有武幹平吳時
與牙門將處前獲孫皓封縣侯官至金城雁門太守
侯馥字世明江陽人也察孝廉平西參軍

關

義後已郡亂避地入牂柯寧州刺史王遜

領平西將軍復取為參軍遜議欲遷牂柯太守謝恕

為涪陵太守出屯巴郡之把口表馥為江陽太守徃
江陽之泚源撫卹蠻獠克復江陵請通長江雄征東
大將軍李恭已在江陽馥招降夷獠修繕舟艦為進取
調預白遜請軍移怒俱出涪陵不能自前恭舉衆攻
馥衆寡不敵為恭所破獲生虜馥送雄雄下廷尉責
曰事君有死無二其次破家與國今縱不死又無益
國灰沒其分守心而已無他願望雄必欲屈之使馥
同郡人張迎曉喻之馥怒罵迎曰吾等國已不能存
大難不能死低看海內何面目相見也且王寧州治
亂才也以吾有桑梓之耻故遠上尚書遣吾討賊受
命之日實忘寢食但裁船未辦請軍未至牽揣不及

為他所先當滅身殞碎以謝不及冀上不負日月下
不愧王侯吾豈苟生如鄉兒女之人乎迎還白雄雄
義而赦之時雄衆寇所獲犍為太守建寧魏紀漢國
太守梓潼文琰巴郡太守巴西黃龕涪陵太守巴西
趙弼永昌謝俊梓柯文猛皆區區稽顙無如馥者數
年卒

語曰文王多士才不同用孔門七十科揆百行殊塗
貴於一致若斯諸子或挺珪璋之質或苞瑚璉之器
或耽儒墨之業或韜王佐之略潛則泥蟠躍則龍飛
揮翻揚芳流光遐紀實西土之珍彥聖晉之多士也
徒以生處限外服膺日淺負荷榮顯未克其能假使

植翰華字振條神區德行自有長短然三趙兩李張
何之軌其有及之者乎譙登侯馥忠規奮烈美志不
遂哀哉

五公

司空何武 司空趙戒 太尉趙謙 司徒趙溫
司空張浩

華陽國志卷第十二

序志

常璩道將



巴蜀厥初開國載在書籍或因文緯或見史記久遠
隱沒寔多踈略及周之世侯伯擅威雖與牧野之師
希同盟要之會而秦資其富用兼天下漢祖階之奄
有四海梁益及晉分益為寧司馬相如嚴君平楊子
雲陽成子玄鄭伯邑尹彭城譙常侍任給事等各集
傳記以作本紀略舉其隅其次聖稱賢仁人志士言
為世軌行為表則者名桂史錄而陳君承祚別為者
舊始漢及魏煥乎可觀然三州土地不復悉載地理
志頗言山水歷代轉久郡縣分連地名改易於以居

然辨物知方猶未詳備于時漢晉方隆官司星列提
封圖簿歲集司空故人君學士陰高堂翳帷幙足綜
物土不必待本紀矣曩遭阨運函夏滔堙李氏據蜀
兵連戰結三州傾墜生民殲盡府庭化為狐狸之窟
城郭蔚為熊羆之窟宅遊雉鹿田棲虎豹平原鮮麥
黍之苗千里茂雞狗之響丘城蕪邑莫有名者嗟乎
三州近為荒裔桑梓之域曠為長野反側惟之心若
焚灼懼益遐棄城隍靡聞乃考諸舊紀先宿所傳并
南裔志驗以漢書取其近是及自所聞以著斯篇又
畧言公孫述蜀書咸熙以來喪亂之事約取舊書士
女英彥又肇自開闢終乎永和三年凡十篇號曰華

陽國記夫書契有五善達道義章法戒通古今表功
勲而後旌賢能恨璩才短少無遠及不早援翰執素
廣訪博咨流離困瘵方資腐帛於顛墻之下求餘光
於灰塵之中靡滅者多故有所闕猶愈於遺忘焉蜀
紀言三皇乘祗車出谷口秦宓曰今之斜谷也及武
王伐紂蜀亦從行史記周貞王之十六年秦厲公城
南鄭此谷道之通久矣而說者以為蜀王因石牛始
通不然也本紀既以炳明而世俗間橫有為蜀傳者
言蜀王蠶叢之間周迴三千歲又云荆人鼈靈歿夙
化西上後為蜀帝周襄弘之血變成碧珠杜宇之魄
化為子鶴又言蜀椎髻左衽未知書文翁始知書學

案蜀紀帝居房心決事參伐則蜀分野言蜀在
帝議政之方帝不議政則王氣流於西故周失紀綱
而蜀先王七國皆王蜀又稱帝此則蠶叢自王杜宇
自帝皆周之祚世安得三千歲且太素資始有生必
死死終物也自古以來未聞死者能更生當世或遇
有之則為怪異子所不言况能為帝王乎碧珠出不
一處地之相距動數千里一人之血豈能致此子鶴

鳥今云是鶴或曰鶴周

今案說文云蜀王望帝始其相妻漸亡去為子鶴鳥故蜀人聞子鶴鳴皆起云

望帝鶴產生切所言與蜀志所述相似爾雅亦云鶴周鶴鳥也出蜀中

四海有之何必在蜀昔

唐帝萬國特雍虞舜光宅八表大禹功濟九州后稷
封殖天下井田之制庠序之教由來遠矣孔子曰述

而不作信而好古竊比於我老彭則彭祖本生蜀為
殷大史夫人為國史作為聖則僂自上世見稱在昔
及周之末服事于秦首為郡縣雖濱戎夷亦有冠冕
故蜀紀曰大人之鄉方大人之國也至于漢興反當
荒服而無書學乎漢書曰郡國之有文學因文翁始
若然翁以前齊魯曾當無文學也漢末時漢中祝元靈
性滑稽用州牧劉焉談調之末與蜀士燕會聊著翰
墨當時以為極歡後人有以為惑恐此之類必起於
元靈之由也惟智者辨其不然幸也綜其理數或以
為西土嶮固衿帶易守世亂先違道治後服若吳楚
然故遁逃必萃奸雄闕覲蓋帝王者統天理物必居

土中德膺命運非可資能恃險以干常亂紀雖饗竊
名號終於絕宗殄祀何者天命不可以詐詭而邀神
器不可以僥倖而取也是以四岳三塗陽城太室九
州之險而不一姓冀之北土馬之所產古無典國夫
恃險憑危不階曆數而能傳國垂世所未有也故公
孫劉氏以敗於前而諸李踵之覆亡於後天人之際
存亡之術可以為永鑒也干運犯曆破家喪國可以
為京觀也今齊之國志貫之一揆同見不臣所以防
狂狡杜奸萌以崇春秋敗絕之道也而顯賢能著治
亂亦以為獎勸也其序曰

先王經畧萬國剖分厥甸巴梁式象懸辰九俊述職

賦政以均佐周數紂相漢亡秦寔繁其民世載其俊
述巴蜀志第一

維天有漢鑒亦有光實司君厚望表我華陽夾劉是應
洪祚攸長

述漢中志第二

井絡啓耀文昌契符茫茫禹績畫爲九州功冒普天
率土以休光靈遐照慶祚爽流邦家濟濟世德球球

述蜀志第三

蠢爾南域在彼要荒漢武德振蠻貊是攘開州列郡
幽裔來王柔遠能通實須才良甄德表失以明紀綱

述南中志第四

赤德中微巨猾干篡白虜乘鸞致民塗炭爰迄靈獻
皇極不建牧后失國英雄迭進覆車齊軌蒙此艱難
述公孫劉二牧志第五

政去王室權流二桀瓜分天壤宰割民物舍彼信順
任此智計大道既隱詭詐競設竝以豪恃力爭當世
居正慮明名號絕替身兼萬乘籍同列國

述劉先主志第六

乾坤渾始樹君立王天工人代萬邦是望明不二日
地不二皇苟非其器窮高必亢濛濛後主弗慮弗臧
負乘致寇世業以喪

述劉後主志第七

陽升三九品物始亨帝紘失振任非其良趙倡禡階
亂是用長羅州播蕩朱旌莫元皮張不造戎醜攸行
袞袞兀黎顧瞻靡望

述大同志第八

素精南飄天維弛綱叢叢特流肆其豺狼蕩雄纂承
殲我益梁牧守顛摧黔首辛嘗三州毀曠悠然以荒
絡結王罔民亦流三

述李特雄期壽勢志第九

華嶽降精江漢吐靈濟濟多士命世克生德為世雋
幹為時貞略舉士女表諸賢明世濟其美不隕其名

述先賢士女摠讚論第十

皇皇大晉下土是覆化澹教洽誕茲彥茂峨峨俊乂
暨暨英秀如嶽之崇如蘭之臭經德秉哲綽然有裕


述後賢志第十一

博考行故摠厥舊聞班序州部區別山川憲章成敗
旌照仁賢抑絀虛妄糾正謬言顯善懲惡以杜未然

述序志第十二

駟牡駉駉萬馬龍飛陶然斯猶阜會京畿磨獲西守
廉從東廩郇伯勞之旬不接辰常茲珍嘉甘心庶然
中為令德一行可師瓊瑋侗儻貴韜光輝據冲體正
平揖宣尼導以禮樂教洽化齊木訥剛毅有威有懷
鏘鏘宮懸磬筦諧諧金奏石拊降福孔皆摠括道檢

摠覽幽微選賢與能入遠乎哉



梁益寧三州先漢以來士女目錄

常道將集

高尚逸民嚴遵字君平

成都人也

高尚逸民林閻字公孺

臨邛人楊雄師之見方言

德行治中從事李弘字仲元

成都人也

德行給事黃門侍郎楊雄字子雲

成都人也

文學神童楊烏

雄子也預父玄文九歲卒

文學侍中揚州刺史張寬字歛文

成都人始受文翁遺業坐宅經還以教授者

文學中郎將司馬相如字長卿

成都人也

文學諫議大夫王褒字子淵

資中人也

尚書郎楊壯

成都人也見揚子方言

美秀中郎將何霸字翁君聊人也

執政大中司空汎鄉侯何武字君公霸弟以忠正為

三公王莽欲篡位憚而殺之

潁川太守何顯

武弟也兄弟五人皆在漢書武子汎嗣武侯王莽時廢

黃門侍郎鄧通蜀人孝文帝時為侍郎甚有寵

卓王孫

臨邛人也見食貨志姑仍舊列於執政臣下

政事左衛護軍陳立字少遷

臨邛人歷牂柯巴郡天水三郡太守治為天下最

節士太中大夫章嗣字公孺

繁人也

節士尚書郎侯罔字宣孟

新繁人也

節士尚書郎王嘉字公卿

江原人也

節士美陽令王皓字子離

江原人也

右十九人在前漢其侍郎田儼楊德意無善事在中也

知士博士羅衍字伯紀成都人也

德政益州太守王阜字世公成都人也

長沙太守任循字伯度

成都人少失父後爲長沙父流離遠居長沙爲郡五官父之母識知是事在精通也

公亮大司農司隸校尉任昉字文始循子也

徐州刺史任愷字文悌

物弟也

文學侍中漢五更張霸字伯饒謚曰文父成都人也

聘士張楷字公超

文父子也

聘士張光超

公超弟也

尚書張陵字處沖

公超子自陵之後世有大官

義士趙定

成都人以延仁赴義濟窮恤乏爲業

保貴太尉司徒司空特進廚亭文侯趙戒字志伯定子

文學國師太常趙典字仲經

戒第二子也

忠亮太尉司徒郢惠侯趙謙字彥信

戒孫也其子孫襲爵亭侯不顯

道德司徒司空趙溫字子柔

謙弟自是後世有二千石

義烈侍中長水校尉常洽字茂臣

江原人見趙溫傳

道德侍御史常詡字孟元

江原人在趙太尉公著善書傳

述作謁者僕射何英字叔俊

郢人也作漢德春秋

經治捷為屬國何汶字景由

英孫也

高士楊由字哀侯

成都人見後漢方術傳

篤慶高士侯祈字升伯

繁人文父楊序弟子

篤慶博士楊珏字仲桓

成都人何羨弟子

公府辟士羅衡字仲伯

郢人亦羨弟子也

至孝孝廉禽堅字孟由

成都人

推賢美陽令柳宗字伯騫

成都人也

求次方 王仲曾 張祚遠

殷知孫

並蜀人伯騫所拔皆致
郡守失其官名

匡正治中從事張充字伯春

江原人

匡正司空辟士李純字孟元

江原人也

猛略部從事楊疎字子恭

成都人也子純為二千石失其官

守憲陳湛字小伯

成都人

節士仲呈

成都人也

高士王廣

諱子也父為公孫述所辟自刎廣逃匿述破後郡及州命察舉皆
不往曰吾不能復辨敵當世榮利也

仁義志士任末字祚本

繁人也

烈士嚴道主簿李磐字文寺

嚴道人也

義烈郡功曹史朱晉字伯禽廣都人也

巴郡太守朱辰字元燕廣都人

述作漢中太守鄭廩字伯邑臨邛人也作者舊傳

右四十人馳名後漢尚書郎張俊失其行事不載字士張字見朱倉傳朱倉字雲卿見字自什邡人傳未詳

大鴻臚何宗字彥英郫人也

雙柏長何雙字漢偶字子雙柏乃建寧郡屬縣也

穎逸廣漢犍為太守何祗字君肅郫人

忠勲輔漢將軍張裔字君嗣成都人也

玄麻太常杜瓊字伯瑜成都人也

侍中常竺字代文在者舊傳

安南將軍張表字伯遠成都人伯父肅廣漢太守兄松字子喬州牧劉璋別駕從事

永昌太守王伉

成都人見蜀書

右八人在劉氏世

五更張霸夫人司馬敬司

成都人也

公乘會婦張氏

廣都人也

犍為楊鳳珪妻陳助

臨邛人也

廣漢便敬賓婦常元常

江原人廣都令常良女也

殷氏婦常靡常

江原人常仲山女也

趙侯夫人常紀常

江原人常常侍女

景奇妻羅貢

郡人羅倩女也

趙憲妻何珣

郡人也

朱赫賢妻張昭儀

繁人也

廣柔長姚超二女姚妣饒郡人也

廣漢王遵妻張妣紀霸女孫也

右十一人烈女

右蜀郡士女七十四人

六十三人
十一人女

明畧渡沔侯范目閬中人

文學聘士浴下宏字長公閬中人也

玄始侍御史任文孫閬中人也

文學司空椽任文公文孫弟也

先生晉君安

見春秋首傳

京兆尹徐誦字子產閬中人也

忠正侍中譙隆字伯司閬中人也

高濂太中大夫譙玄字君黃閩中人也

潔白尚書郎譙瑛玄子也以易授孝明帝

公車令趙琇字孫明閩中人也

公府掾趙毅字仲都琇子也

公車令臧太伯宕渠人也見琇傳

雋才涼州刺史趙宏字溫柔閩中人也

右十三人前漢

政事揚州刺史嚴遵字王思閩中人也

徐州牧嚴翊字子翼王思子也

長安令王偉御王思友見王思傳

政事大司農玄賀字文和宕渠人也

將畧大鴻臚龐雄字宣孟宕渠人也

政事幽州刺史馮煥宕渠人也

嗣略使持節車騎將軍馮緄字鴻御煥子

降虜都尉馮元字公信緄弟

尚書郎馮遵字文衡元子

政事司隸校尉陳禪字紀山安漢人

漢中太守陳澄禪子

別駕從事陳實字盛先澄弟也與王文表為友

思防治中從事楊仁字文義閬中人也

志士荊州刺史龔調字林侯安漢人也

忠貞魏郡太守趙晏字平仲安漢人也

籌畫益州太守李顯字德印墊江人也漢書及巴耆舊也

汝南太守謁煥字闕江州人也見汝南紀

度遠將軍桂陽太守然溫字闕江州人見巴耆舊傳

美化越雋太守張翕字林陽吳漢人也

越雋太守張璠翁子也太守三堂寮舉孝廉

至孝上蔡令趙邵字泰伯閬中人也

孝子嚴永 名儒陳髦 隱士黃錯右三人已邵太守三堂寮進失其官位見堂傳

巴郡太守龔楊字闕墊江人

茂才孟彪江州人右並王父表所薦

日南太守黎景字闕墊江人

茂才王澹閬中人見文表傳

文學椽龔策 楚江人

桂陽太守李溫 宕渠人

戶曹椽趙芬 宕渠人

上庸太守陳弘 安漢人 見巴紀

忠義宕渠主簿曲庚 宕渠人也

忠義宕渠主簿馮湛 宕渠人也

烈士郝伯都 閬中人

右三十九人 後漢司隸校尉陳烏等失其事不錄

義烈江陽太守程畿 字季默 閬中人也

程祁 字公弘 畿子也

楊汰 字季儒 巴西人

韓儼 巴西人

黎鞏 巴西人 三人見楊文

壯烈將軍嚴顏

臨江人也見張飛傳

玄真徵士周舒字耕布

閩中人也

文學儒林校尉周羣字仲直舒子也

博士周臣羣子也

雅重車騎將軍育陽景侯黃權字公衡

閩中人在魏儀同三司

尚書郎黃崇

權子也

勇壯折衝將軍西陵太守甘寧字興霸

臨江人仕吳

政事鎮南大將軍彭鄉亭侯長忠字德信

閩中人

將略鎮北大將軍安漢侯王平字子均

宕渠人

果壯左將軍宕渠侯句扶字孝興

漢昌人見王平傳

將略盪寇將軍關內侯張嶷字伯岐

南充國人也

尚書僕射姚弋仲字子緒閩中人見楊義傳諸葛故事也

別駕從事馬勳字盛衡閩中人見季漢軸臣傳

尚書馬參字丞伯閩中人見蜀書

越雋太守龔祿字德緒安漢人父譙糖為太守見巴紀

鎮軍將軍龔儼字德光祿弟也

徵士譙嶢字榮始西元國人也周父

淵通散騎常侍城陽亭侯譙周字允南嶢子在劉氏光祿大夫

右二十三人在劉氏三國之世

馬妙祈妻義貞烈 趙雲君妻華貞烈

王元憤妻姬貞烈已上皆閩中 趙瑁妻姬節烈宕渠人

童女趙英瑁女 趙萬妻娥宕渠人

耿秉妻行

安漢人

鮮居母姜

安漢人

右八人烈女

右巴郡凡士女七十八人

士七十人
八人女

道德三老楊統字仲通

新都人也曾祖仲續祁令父春卿為公稱述林

光祿大夫楊博字仲達

統長子

文學侍中楊序字仲桓謚曰文父

博弟

高士寇權字文儀

綿竹人序弟子也

高士昭約字節宰

維人也序弟子二人見序傳

術藝使持節交州牧楊宣字君緯

什邡人

學士嚴象

廣漢人宣弟子也

大儒趙翹

廣漢人宣弟子也

烏丸校尉郭堅

維人也

善績司隸校尉郭賀字喬卿

隸孫

永昌太守鄭純字長伯

鄭人也

文學高士王祐字平仲

鄭人也弟湛有文才而不急行事也

文才樂安相李尤字伯仁

維人也

尚書郎李亮

尤孫也

文才東觀郎李勝字茂通

維人也尤傳

公亮將作大匠翟醜字超

維人

聘士王稚字林起謚曰憲文

堂少子也

堂長子博

失官位

博子遵

亦失官位

善績蜀郡太守王商字文表遵子

隱士夫子段翳字元章

新都人也

元烈辟士段恭字節英

新都人也

武威太守南陽折侯張江

維人

鬱林太守折國

江四世孫因封國改信折

高士折象字伯式

國之子也

治中祭酒朱倉字雲卿

什邡人

政事牂柯太守劉寵字世信

緜竹人

孝子江陽符長姜詩字士遊

維人

陰德郡令王恽字少林

新都人也

交州牧羊甚

郫人也

推讓野王令羊蒼字仲魚甚子

文學侍中董扶字茂安綿竹人楊厚弟子也

文學聘士任安字定祖綿竹人亦厚弟子

高讓義士杜真字孟宗綿竹人

精誠五官諱輔字漢儒新都人

義士楊寬字仲新都人父武兄混皆有證明君事失其官位

義士張鉗字子安廣漢人也

烈士賈栩字元集什邡人也

節士竇勣字茂秦廣漢人也

忠義綿竹主簿韓煥字伯彥

壯童左喬雲綿竹人
孝廉汝躬新都人

周幹

廣漢人

彭懿

廣漢人

古朴

廣漢人

右三人儒學文字見蜀志及王商傳

方術太醫丞郭玉字通直

右五十二人馳名漢世

別駕從事李朝字永南

鄭人也

丞相西曹掾李邵字偉南

朝弟也

文才大司農秦宓字子敕

綿竹也

益州太守王士義字彊

鄭人王祐從弟也

別駕從事王甫字國山

文表弟也

優游特進太常關內侯鐔承字公文鄭人

才雋江陽太守彭秉字年

廣漢人

忠謀從事鄭度

綿竹人也見劉璋傳

忠烈從事王累 新都人也見劉璋傳

右九人在劉氏世及二牧時

聘士任安母姚 綿竹人也

姜詩妻龐行 雒人也

姜嬪字義舊 綿竹也秋道長姜稭女司馬稚妻

廖伯妻殷紀配 廣漢人也

便敬妻王和 新

李珥妻進娥 鄭人李氏女馮季宰妻也

王輔妻彭非 廣漢人也

李平字正流 廣漢李元女楊文妻

袁稚妻相烏 德陽人也

汝新妻

失姓不知何郡縣人

右十一人烈女

右廣漢郡凡士女七十二人

六十一人
十一人女

知術光祿大夫關內侯王迺世字長祿

資中人

揚州刺史楊莽字翁君武陽人見何霸傳

忠壯復漢將軍朱遵字孝仲武陽人也

隱知徵士任永字君業夔道人也

隱遯合浦太守費貽字奉君南安人

精密上黨太守趙松字君橋武陽人

文學城門校尉董鈞字文伯資中人

秀穎司隸校尉楊渙字孟文武陽人見魏志者舊傳

漢中太守楊文方

漢子文方子穎伯冀州刺史仲穎二千石夫其行事也

政事司隸校尉楊準字伯邳

文方兄子太守太尉李固舉之

清秀大司空張皓字升明

武陽人也

正直光祿大夫廣陵太守張綱字文紀

皓子也

郎中張植

綱子也

尚書張續

植弟也

豫州牧張方字公始

續弟也

正直司隸校尉趙旂字子鸞

資中人也

別駕從事王元

武陽人刺史張喬時見楊統傳

義士公車令杜撫字和

資中人也

義士新都令趙新字建侯

武陽人也

孝士尚書郎隗相字和通

樊通人也

呂孟

南安人不詳其事

吳順字紉和 犍道人

學士韓子方

犍道人張貞之師

學士謝襄

南安人見張鉗傳

右二十四人在漢世

政事蜀郡太守閔內侯楊洪字季休

武陽人

固率諫議大夫賞詩字公舉

南安人

忠正車騎將軍都亭侯張翼字伯恭

武陽人綱後也

文學五官中郎將伍梁字德山

南安人

文才射聲校尉楊羲字文然

武陽人

右五人在劉氏世

從事賈龍不悉其事不錄

漢中太守楊文方妻陽姬

武陽人

相登妻周度

發道人也

曹禁字敬姬

南安人周紀妻也

程貞玫字瑗玉

牛鞞人資中張惟妻也

尹仲讓妻韓姜

發道人也

儀成妻謝姬

南安人也

趙媛姜

資中人趙盛道妻也

張貞妻黃帛

發道人也

楊進

武陽人廣漢王博妻

右九人列女

右犍為郡士女凡三十八人

二十九人
士九人女

忠正城陽中尉鄧公

成國人景帝時

楊王孫

致遠衛尉博望侯張騫成固人武帝時

爽朗給事中張猛審孫元帝時

高尚逸民鄭子真襄中人成帝時

大儒李頡南鄭人

文學司徒李郃字孟節頡子

執正太尉李固字子堅郃子

雅望京兆尹李燮字德公固子

奉車都尉李歷字季子固從弟也

善績司隸校尉李法字伯度南鄭人也

犍為太守趙宣字子雅南鄭人也

德望廣漢太守趙瑤字元珪宣子

溫雅尚書趙瑛字稚珪

瑛弟

義壯弘農太守陳綱字仲卿

成國人也

義烈從事陳調字元化

綱孫

知思巴郡太守陳雅字伯壹

成國人也

南郡太守程基字稚業

南鄭人也

大鴻臚劉巨公

南鄭人見列女傳

廣漢屬國張恭字伯彊

南鄭人也

政事度遠將軍張亮則字元修

恭從弟

愷悌綿竹令閻憲字孟度

成國人也

隱士樊志張

南鄭人也見征西將軍段熲傳

尚志聘士衛衡字伯梁

南鄭人樊志張弟子也

籌畫計曹史程苞字元道

南鄭人也

文才蒞萌長祝龜字元靈

南鄭人也

義烈郡主簿段崇字禮高

南鄭人也

義烈功曹曹程信字伯義

南鄭人也

嚴孳

李容

陳已

王宗

姜濟

曹廉

勾矩

劉旌

原康

九人太守鄭廣史見程崇程信傳

義烈從事燕邠字元侯

南鄭人

義烈主簿趙嵩字伯高

南鄭人

右三十八人後漢

陳術字申伯

歷三郡太守見蜀書術蓋部耆舊傳者

右一人劉氏世之

李穆姜

安衆令程祗妻李法姑也子基

劉泰瑛

巨公女楊推妻

杜泰姬

南鄭人魏爲太守趙宣妻

楊禮珪

成固楊元珍女陳省妻

李文姬

太尉固女趙瑛妻

陳順謙

鄧令書寧妻陳伯臺從女也兒子陳規著書稱之

陳惠謙

順謙妹度遼將軍張亮刺夫人

張禮修

南鄭人趙嵩妻

韓樹南

南鄭人趙子賤妻也

右九人烈女

右漢中郡士女凡五十人

四十一人
九人女

忠義鎮遠將軍義侯文齊字子奇

梓潼人也平帝用為益州太守遂不服王莽公孫述光武嘉之

北海太守文純

齊子

節士李業字巨遊

梓潼人也

遂久令李翬

業子

益州太守景毅字文堅

梓潼人也

政事有道景鸞字漢伯

梓潼人也

文學孝廉楊充字盛國

梓潼人也

壯烈濟陰相寇祺字宰朝

梓潼人也

壯烈童人李餘

涪也

義士功曹張壽字伯禧

涪人也

義士王晏字秣博

涪人也

方士李取字翁君

涪人也

右十二人漢世

尚玄諫議大夫杜微字國輔

涪人也

李仁字德賢

涪人也

太子僕李異字欽仲

仁子

太子家令尹默字思潛

涪人也

丞相參軍文恭字仲賢

梓潼人也

果銳前監軍將軍司馬李福字孫德

涪人見諸葛故事蜀書

右六人劉氏世

文極字季姜

梓潼人將作大匠王堂夫人也

巴郡虞頭妻杜慈

涪杜季女也

郭孟妻楊敬

涪楊女也

右烈女三

右梓潼郡士女二十一人

十八人女三人

修慎少府太常閔內侯王謀字元恭

漢嘉人也

雲南太守張休

右二人漢嘉人士在劉氏世

文學制州刺史尹珍字道珍

母歛人也

巴郡太守傅宝字紀圖

下夷人也

忠義冠軍將軍寧州刺史謝恕字茂理

母歛人也

右三人牂柯人士

忠義大將軍賴侯祭酒錫光字長沖

右一人西城人士

忠義雲南太守陽遷亭侯呂凱字季平

右一人永昌人士

義正安漢將軍建寧太守李恢字德昂

領軍襄習

御史中丞孟獲

右三人建寧人士

輔漢將軍孟琰字休明

右一人朱提人士

先涪和女絡符人也

右一人烈女江陽人

大凡三州十三郡自漢興至三國之終士女載傳記

者三百四十人

二百九十三人
士四十七人
女

公七人

大將軍二十二

侯二十人

御佐十四人

侍中七人

尚書五人

司隸校尉六人

州刺史十三人

郡守四十八人

國師三人

光祿大夫四人

尚書郎十二人

中書郎將御史六人

公車令諫議太中十一人

公府辟士八人

高士一人

聘士七人

徵士四人

節士四人

烈女四十七人

益梁寧三州三國兩晉以來人士目錄

添五日錄

明略大司農西城公何攀字惠興
郡人

清秀大長秋壽良字文湫

成都人也

果烈西河太守柳隱字休然

成都人也

益梁二州都督杜禎

成都人也

都督度支巴東太守柳伸字雅厚

成都人也

德行江陽太守何隨字季業

郫人也

令德捷為太守杜軫字超宗

成都人也

捷為太守杜烈字仲武

軫弟

建寧太守杜良字幼倫

益州刺史杜毗字長基

德行給事中任熙字伯遠

成都人也

涪陵太守任蕃字憲祖

熙子

義正郾令常勳字修業

江原人也

州都常忌字茂通

勳從弟也

令才太史令高玩字伯珍

江原人也

溫才湘東太守常騫字季桓

江原人也

述作武平太守常寬字恭恭

騫從弟也

使持節西夷校尉張岐字紹茂

成都人也

征西將軍西夷校尉益州刺史王異字彥明

成都人也

勇略雍州刺史南中郎將重安開國侯李陽字文林

郾人

征虜將軍廣漢梓潼太守楊謙字令志

成都人也

右二十二人蜀郡人在晉世

強濟少府成都威侯李毅字允剛

郾人

西夷校尉李釗字世康

穀子

仁讓漢嘉太守司馬勝之字興先

綿竹人

德義梓潼太守王化字伯遠

郫人文表孫

巴東太守王振字仲遠

化弟也

作唐令王岱字季遠

振弟也

述作蜀郡太守王崇字幼遠

岱弟也

素隱中書郎王長文字德雋

郫人也

建寧太守耿容字宗仲

廣漢人也

右九人廣漢人在晉世

漢中太守李宓字令伯

武陽人也

汶山太守李賜字宗碩

宓子也

太傅參軍李興字雋頭賜字也

廣漢太守張衡字建興翼子也

譙國內史曹緝字文平南安人二子見壽良傳

執義衡陽太守楊邠字岐之武陽人

清正尚書貴立字建熙南安人

右七人捷為人士在晉世

衛尉文立字廣休臨江人也

武陽太守楊守臨江人也

牂柯太守毛楚杞人

右三人巴郡人在晉世

述作太子中庶子陳壽字承祚安漢人

驃騎府掾陳荏字林度

壽兒子

上廡令陳符字長住

壽兒子

建寧太守陳階字達芝

荏弟

正直漢中太守閻績字績伯

吳漢人

卓略長水校尉荊州刺史張奕字希祖

南充國人

義烈楊烈將軍梓潼內史譙登字順明

周孫

令德錫令譙同字彥紹

周子見周傳

右八人巴西人士在晉世

清重長水校尉呂淋字偉德

右一人漢中人

廣漢太守李驥字林龍

福子

右一人梓潼人

忠義江陽太守侯獲字世明

右一人江陽人

三州後賢五十一人并前賢三百九十一人

譚曰凡此人士或見漢書或載者舊或見郡紀或在三國書并取其秀異表之斯篇其弘伐洪顯者生附載者齊之其但見名目而不詳其行故或有以傳無珍善闕之以副直文為實錄矣

華陽國志卷第十二

